


NYUMÀ MWÎMPÈ NCINYÌ?

 ...bikolè be bwà disangisha. Bìdi bìkèngela bwà edi disangisha diikalèku dishiilàngàne ndambù ne atùtù twenza pa ciibidilu kaaba aka awu. Misangu pàmwè ne yònsò, patùtù tudisangisha kaaba aka, citu ndisangisha bwà. . .bwà dyondopiibwa dyà babèèdi ne bwà majinga à mubidi. Pa byôbì abi ki patùtù tusùminyina. Kàdi dilòlò edi tudi babangè ditàbuluja edi bwà dyondopiibwa dyà musùukà, nyu—nyumà wa muntu.

Cibi, bu Mukalenge mwà kwanyisha, mu dyàlumingu mu dindà, mu kàlaasà kàà Dyàlumingu, mu dyàlumingu mu dindà, netwikalè mwà kwenza disambila dyà babèèdi ne mulongo wà babèèdi wà ciibidilu, bwà mu dyàlumingu mu dindà, bu Mukalenge mwà kwanyisha. Nènku malòlò à mu lumingu elu aa, tudi basàkiibwe bikolè bwà kwakula pa bintu byà Cyendèlèlè bwà mu—musùukà.

² Mpindyewu, tudi bamanyè ne pàdi mu—mubidi wòndopiibwa, aci cidi citùpèèsha bwònsò disànkà, bwalu tudi bamanyè ne cidi cileeja ne ditwishiibwa dyònsò ne Nzambi wetù ùdi wòndopa babèèdi. Kàdi mwine mubèèdi awu, yèyè mushààle ne mwoyi ntàntà mule mukùmbàne, pàmwàpa yèyè's neàsaamè kàbidi, pàmwàpa dyòdi disaamà dimwèdimwè divwàye mwondòpiibwe adi, kàdi aci kacýèna cyùmusha dyondopa nànsha. Ngàngàbukà udi mwà kufila bwanga bwà disaamà dyà bisùlùsùlù, ne pàmwàpa paanyimà pàà matùkù àbidi yèyè ùdi mwà kufwà disaamà dyà bisùlùsùlù adi paanyimà pà ngàngàbukà mumanè kwamba mùdiye mwondòpiibwe. Dìdi dyàlukila cyàkàbidi. Kàdi pàdi musùukà awu mwòndopiibwe, díbà adi, munda mwèbè amu, udi ne mwoyi wà Cyendèlèlè.

³ Ne mèmè ndi ngiitabuuja ne tudi pabwìpì menemene ne Dilwa dyà Mukalenge Yesù, mu mùshindù wà ne bìdi ne mushinga kutùdi bwà twètù kwenza cyònsò citùdiku pèètù mwà kwenza aci bwà kufikisha musùukà wònsò ku Bukalenge, ne kufikisha Bukalenge kùdi bantu, bwà twamònakù mwà kwondopiibwa nyumà yètù. Mèmè ndi ngiitabuuja ne mubidi wà Yesù ki mubidi wùdi mutàmbe kwikala wùsaama wùndiku pàànyì mumanye; mbwena kwamba ne, mu—mubidi, mubidi wà nyumà wà Kilistò pa buloba, ngùdi wùsaamà bikolè.

⁴ Nènku mpindyewu, katwèna tudilongolola bwà kunùlama ntàntà mupitèpìte bule dilòlò to, bwalu mu dilòlò dyà kumpàla katwèna ne myaba yà kusòmbesha balunda bèètù bananga to. Tudi ne ndongamu wa kwibaka èkéleeziyà mupyàmùpyà, tabernacle munene mwab'ewu mene pa citùpà cyà buloba eci,

anyì mwaba wónsò wàlombolà Mukalenge awu; kadi bwà ku dyètù dimanya, mmwaba ewu.

⁵ Nenku mpindyewu tudi bamanyishe bwà masangisha, kuumukila ku diisátù too ne ku dyàlumingu. Kadi dībà adi ku dyàlumingu, ki dyoya bwa kubwela mu diikisha dyà Noël, kadi . . . dībà dyónsò dyàtwàm bilà Mukalenge bwà kwimanyika adi, ki ciikalà dībà ncyòci aci. Katwèna ànu bamanyè ne bipeta nebiikalè cinyi to. Kadi bu mutùdi twitabuuja ne bantu ku tabernacle eku ne èkèleeziyà myànà yètù (bìdi ne, umwe wa—wa ku yôyi n'tabernacle wa cijila wa mu Utica, mùdi Mwanèètù Graham Snelling mwikàle mpaasàtà, ne mu New Albany mùdi Mwanèètù—Mwanèètù Junie Jackson mwikàle mpaasàtà, ne kàbidì ku cibeeba kwàka kùdi Mwanèètù Ruddell mwikàle mpaasàtà), twètù ne bóbò, tudi èkèleeziyà myànà yètù yà tabernacle ewu, tudi tuteeta bwà kufikishakù. . . bantu batùdi naabò mu bwobùm wè bwà butàmbe bwimpè ne Kilistò. Ki kiipàcilà kèètù nkòkò aku. Pa nanku ndi musungùle bwà kubala ne kulongesha pa, bwà ndambu wa malòlò àdi àlon dà aa. . .

⁶ Dilòlò edì ndi muswè kwakula pa cyena-bwalu eci: *Nyumà Mwimpè Ncinyi?* Ne màalabà dilòlò, ndi muswè kuyiisha pa ne: *Yèyè Wàkafidiibwa Bwà Cinyi?* Ne mu diitànù dilòlò. . . Ne, bwà bakwàci bàà mèyi pa mikàbà, ncyèna muswè bwà cyà mu diitànù eci cikwàciibwè pa mikàbà to: *Ndi Mpeta Nyumà Mwimpè Munyi?* ne *Ndi Mmanya Munyi Pàndì M'Mupeta?* Nenku dībà adi netùlekelè ànu cyanàànà, dībà adi tùmone mwikalà Mukalenge mwà kutùlombola amu, bwà mu diisambòmbò ne mu dyàlumingu. Nenku mu dyàlumingu mu dindà, disangisha dyà dyondopa, ne disangisha dikwàbò dyà butangadiki bwà mu dyàlumingu dilòlò.

⁷ Nenku tudi baswè bwà bantu bònso bàmanyè ne. . . Kàbidì ndi mumanye ne bisanji bìdi bikwàta mèyi pa mikàbà bìdi munkaci mwà konyunguluka mu cibambalu cyà kumfundu mwàmwa, ne tudi tujinga kwamba nunku ewu. Bwalu, mu masangisha a bu nunku ewu aa, a mùshindù wa butangadiki aa, tudi ne bantu bàà mu màngumba àà èkèleeziyà mishilèshilàngàne bàdi balongèshibwe mu cijèngù cyàbò bóbò cyà diitabuuja, muntu ne muntu. Ne ciine aci's cidi ànu cimpè. Kacyapù mèmè ncutukù muswè kwambula dipiila dyà kumyamina dipangakanangana munkaci mwà bânà bèètù nànsha. Ne mu masangisha à pântù mpátuka, ntu nyiisha ànu pa Malelèlè manène à butangadiki à mu Mifundu, bìdi bânà bèètù bàdi bàtùla mfranga yàbò bwà disangisha dyànyì abu biitabuuja. Kadi, mu tabernacle emu, ndi—ndi muswè kwakula pa bitùdi twètù twitabuuja. Ki bwà cinyi, wèwè—wèwè kùyi mubyùmwè to, ndi mufwànyine kwikala ne disànkà dyàbùngì dyà kupeta mukàndà mumfùndila anyì kabeji kàà kùdi, bwà kungeela lukonko lwà—lwà kumanya ne mbwà cinyi tudi tubiitabuuja nanku awu. Ne ndi mufwànyine kwikala ne

disànkà dyà kuteetakù kubyùmvwija ne mwànyì pàànyì mwònsò mündi naamu amu.

⁸ Nudi bamanyè's, èkèleeziyà ne èkèleeziyà yònsò ewu, nwènù kanùyì ne dilongesha dyà nshindameenu to, kanwèna èkèleeziyà nànsha. Bikèngela nwikalèku ne cintu kampànda cinùdi nutwà nyama ku mikòlò, mèyì makùlù kampànda anùdi nutwà nyama ku mikòlò. Ne katùyì tutàngila kùdi muntu mukadiswikà anyì cidì dingumba dyèndè difwànyine kwikala to, muntu awu yèyè ànu mulediibwe cyàkàbìdì ku Nyumà wa Nzambi, awu mmwanèètù wa balùme anyì wa bakàji, katùyì tutàngila byà ne...Tudi bafwànyine kwikala bapangàkàne mu bimwè bintu, mùdi ntàntà wa kuumuka ku esètè too ne ku wesètè, kadi tudi ànu bânà bàà muntu. Ne ncyènáku mufwànyine kwenza cintu nànsha címwè to ànu kwambulwisha mwanèètù awu bwà nsòmbelu wa mutàmbe bwimpè, wa mutàmbe kuseemena pàmwè ne Kilisto. Ne ndi ngeela meeji ne, mwena Kilisto yònsò wa cyà bushùwà ne mulelèlà ewu mmufwànyine kungenzela pàànyì cintu címwècímwè aci.

⁹ Mpindyewu, ndi mulombe tabernacle ewu...Mpindyewu, katwèna tubwela mu cyòci eci cyènzè ànu bu disangisha dyà dilepàkànàngàne to. Ndi muswè kubwela mu cyòci eci, ne ndi muswè bwà nwènù, ne munùlòmbe, bwà kwosha cilamba ne cilamba cyònsò cidì paanyima pèènù, ne kulongolola mpèkaatù ne mpèkaatù yònsò, mu mùshindù wà ne tudi tubwela mu cyòci eci ne cyònsò cidì mu myoyi yètù ne nsòmbelu yètù. Tudi ne cyà kulwa kaaba aka mu kiipàcilà kamwèpelè kàà kulongolola misùukà yètù bwà Dilwa dyà Mukalenge, ne kakùyikù bwà mu kiipàcilà kakwàbò to. Ne ànu mungákùlù ne mungàmbi ne, pàmwàpa misangu mikwàbò ndi mufwànyine kulongesha anyì kwamba cintu kampànda cidì cifwànyine kubèngàngana ndambù ne cyà muntu mukwàbò kampànda, mùshindù wùdiye yèyè ùciitabuuja. Mèmè—mèmè ncyèna—ncyèna mulwè bwà dikòkàngana to, nudi numòna's, ndi—ndi mulwè...Tudi kaaba aka mbwà kulongolola Dilwa dyà Mukalenge. Ne ndi ngeela meeji ne kasùmbù kakesè aka... .

¹⁰ Ndi ne ndambù wa bânà bèètù beenyi kaaba aka bândi mumanye, bàà ku myaba mishilèshilàngàne, ne tudi ne disànkà dyà kwikalakù naabò. Ne kakùyì mpatà to mu batèeleji mwònsò amu, kùdi bakwàbò bàà pambelu pàà cimenga, bafùmìne mu tuubimenga twètù twà tukesè etu tùdi tutwàngàne neetù etu. Nenku tudi ne disànkà dyà kwikalakù neenu, ne tudi tunwànyisha bikolè, panwikalà batùnangè bikùmbàne byà nulwa bwà kutèèlèja maalu aa. Nzambi...Wàlukilèku kwèbè kumbelu, wèwè mwanèètù wa balùme, wèwè mwanèètù wa bakàji, ne mabanji matàmbe kubanjika àdi Nzambi mwà kupòngolola mu mwoyi wèbè, ki dyànyì disambila ndyòdi adi.

¹¹ Ne bwà kaatabernacle kakesè aka, bu mündi ngeela meeji ne mbàmwè bàà ku bantu bàdi batàmbe kwikala bàà maalu

malenga bāndi ngiitabuuja ne bādi pa buloba ebu, bātù bālwa mu tabernacle ewu. Mpindyewu, ncyêna mwambe ne bantu “bônso” bādi batāmbe kwikala bāa maalu malenga to. Ngāmbi ne bāmwe bāa ku bantu bādi batāmbe kwikala bāa maalu malenga pa buloba bātù bālwa mu tabernacle ewu. Kādi bu mùdìbi ne ku ditùkù ne ku ditùkù, pāntù ngàalukila, nguumuka ku disangisha nya ku dikwàbò, ndi mmòna dijinga dinène mu tabernacle ewu, dijinga dinène diikālemù, ne diine adi diikāle dyà dyujiibwa, anyì dyà didilāmbula, nsòmbelu wa mutāmbe kwikala wa ndòndò, lwendu lwà sheemāsheemà ne Nzambì. Nenku ntu mubālayè bwà kwenza cyôci eci, bwà kubātwardila Mayiisha aa. Nènku tudi ne disānkā dyà kunùbwejamù ne kunùbwejakù mu bwobùmwè neetù banyùngulùkile Dìyi dyà Nzambì, patùdì tulongesha ne tuteeta kuāt wàla apa.

¹² Mpindyewu, mu malòlò àsātù a ntwādijilu katwàkwangata cyena-bwalu kampānda bwà kuyiishapù to, kādi ànu Dìyiisha kampānda bwà kulongesha byùmukila mu Dìyi dyà Nzambì.

Nenku mpindyewu, bwalu, ncyêna mufwānyine kulòmba muntu bwà kwenzayè cintu kampānda cīndì mēmè mwine nciyi mufwānyine kwenza to. Kadi lumingu elu lùvwa bwānyì mēmè Kalvariyo ànu kèètù kàa menemene aka. Kùvwa kunshàādile ànu kaaba kakesè menemene bwà—bwà kujimija lungenyi, mùndì mufwānyine kucyāmba’s, mu mùshindù wà ne nkāāvwa mwambè kushāala nciyi mu mēmè to. Kadi ndi mulekèlèle ànu menemene diswa dyònsò, ne byònsò bìndìku mumanye abi, kùdì Mukalenge.

¹³ Bufùkù kampānda, lwà paanyimà pāa mundankulù ndambù, mēmè ne mukājàanyi, paanyimà pāa twètù bashāale basòmbè katùyì balāale to, biikāle tusambila ne twakula ne Mukalenge, ewu dyāmùnu ewu dyām wām wā dyà katambwa kakesè mu. . . mu cibambalu cyètù cyà kumpālā kwà nzùbu aci, biikāle ne Bibles yibidì mibuulula, twètù kudilāmbula cyākābidi kùdì Nzambì, bwà mudimu mu kaabujimà, bwa twètù kulekelela dyètù diswa dyà sungasunga, ne byònsò, ne meeji ònsò à luseka lubì, bwà kukwācila Mukalenge Yesù mudimu.

Ne ndi mutwishiiibwe ne, ki cìdì lwenu peenu lwidì, bwà ne nudi benze cintu cimwècimwè aci. Dìbà adi patùdì tulwa dilòlò edi apa, tudi tulwa mu myaba ya cijila, munkaci mwà bantu bādi basambile, ne bajilè byākudyà, ne baalùjùlùle bintu, ne badilongòlòle bwà kwakidila cintu kampānda cyà kùdì Nzambì. Ne ndi mumanye ne ewu wālwa mwikāle ne nzala kākuumuka ne nzala to, kadi Nzambì neāmudiishè ne Dyāmpā dyà Mwoyi.

¹⁴ Mpindyewu, kumpālā kwà kubala mu Mukānda Wèndè munsantu, twinyikāayikù mitù yèètù katanci kakesè cyanānā bwà disambila.

¹⁵ Mukalenge, kùkaadi disambila dimana kwenza kaaba aka dilòlò edi. Kùkaadi. . . misambu yà mu Sionā yikaadi

mimbiibwe kùdi bânà Bèbè. Myoyi yàbò mimana kubàndisha. Ne tudi balwè kaaba aka bwà kudilàmbula Kùdi, ne bwà kuKukuukwila byùmukila mu ndòndò yà musùùkà wètù. Ne tudi tuKuvùlwija nùku, Mukalenge, ne Wèwè wákamba paÚvwà musómbe pa mukùnà ulongesha bayiidi Bèbè ne: “Bàà dyàkalenga ng’aba bàdi ne nzala ne nyòòtà ya bwakàne, bwalu bóbò nebùùkucishiibwè.” Wákacilaya ng’Wèwè, Mukalenge. Nyewu tulwa dilòòlò edi ne myoyi myunzulula. Tulwàlwa, biikàle ne nzala ne nyòòtà, ne tudi bamanye ne Wèwè neùshaalè mukwàte ku mulayì Wèbè.

¹⁶ Patùdì tudyenzeja bwà kubuulula mabeji mansantu a Bible aa apa, bwà kubala bìdì Mwómò, swàku bwà Nyumà Mwìmpè àBifikishèku ànu mu mwoyi ne mwoyi wònsò. Ne swàku bwà Dimiinu adi dìmàtè mu diitabuuya dyà ndòndò ne dibanjike, dyàpàtulà mulayì ne mulayì wònsò wùdì Dìyì difile. Tùmvwilèku, Mukalenge, ne tùkezùlèku, ne tùteetèku. Ne kwòkò cintu kampànda cikoooyike kutùdì, Mukalenge, mpèkaatù kampànda udi kàyì mutonda, cintu kanà cyònsò cidì kaciyi cijaalàme, cisokòlòlèku mpindyewu mene, Mukalenge, netùye buludi kacýenza, bwalu tudi bamanyè ne tudi ne mwoyi mu mindidimbi yà Dilwa dyà Mukalenge Yesù. Kabidi, Éyì Nzambi wa Cijila, tudi babwelè mu mindidimbi yà bwakànè Bwèbè—Bwèbè dilòòlò edi, ne tudi tusengeleela bwà dibanjijiibwa dipyadiya, ne didilàmbula, ne dyujiibwa tètè ne Nyumà Mwìmpè mu nsòmbelu yètù.

¹⁷ Patùdì tumòna tupyà twà ditàbuluja tubangè kubwicedila, enzàku bwà twèlè nkunyi yà Dìyì, bwà Diteemeshè kapyà kapyakàpyà, bwà myoyi yètù kuulayì tètè ne lukunukunu. Tùjidilèku, Mukalenge, ku Dìyì Dyèbè dyà mushinga mukole ne Mashi Èbè, ne ngàsà Webè, mutùdì tusengeleela. Nèku twasàkidila twònsò ne butùmbi nebiikalè Byèbè. Umushaku bubì bwònsò mu myoyi yètù. Tùkezùlèku, Éyì Mukalenge. Tùpèshèku myoyi mikezùke, ne byanza bitòòke, ne meeji matòòke, bwà twamònakù mwà kubwela mu mwaba Wèbè wà cijila, dilòòlò ne dilòòlò dyònsò, biikàle tucyònkómoka ne bùle tètè ne Nyumà Webè. Tudi tulòmba nùku mu Dìnà dyà Yesù, ne bwa bwalu Bwèndè. Amen.

¹⁸ Ndi njinga kubala Dìyì mpindyewu mene. Ne patùcidì . . . Ndi nnùlòmba bwà nwènù kwikala kulwa ne Bibles yènù, crayons yènù, ne mabeji enu, bwà Mifùndu. Nwènù nujinga nànkù mùshindù awu, mbifwànyine kwikala bilenga be. Nèku mpindyewu panùcidì nuya ku nshapità wa 7 wa Byenzedi apu, bwa kubanga nendè; bwà kwandamuna ku lukonko, anyi bwà kubanga kwandamuna ku lukonko lwà ne: *Nyumà Mwìmpè Ncinyi?*

¹⁹ Kakwèna cyàcimunà Sàtaanà, kacya kí nkwanjì kwikalakù cintu pa buloba cidì cifwànyine kucimuna Sàtaanà, bu mùdì

Díyì dyà Nzambì to. Yesù wàkakwàta naaDì mudimu mu mvità Yèndè minène ayi; Wàkamba ne: “Bààkafùnda ne . . .”

²⁰ Nènkù mu dindà emu, pámvwà ntèèleja, kùkaadi ndambù wa matùkù, ku tudyòmbà tùvwà tùmweka bu túsua kwamba ne bufùki mbufùmine ànu ku butù kampàndà bùvwà bupèèpùke kadi kukwàtakana, ne ndambù wa binshidimba, ne ndambù wa mishindà yà mu buloba, ne muunyà wà luuyà lukolè kufùkabi mùtòlokù wà mwoyi ne kutwàlaci mwoyi. Macimbu kaayi! Pàdibi ne, muunyà awu wùdi wùshipa mùtòlokù wà mwoyi kanà wònsò. Tèèka ànu mùtòlokù pa muunyà, s’newùwùshipè dyàkàmwè. Ne kakwènakù cintu cyà mùshindù awu to; kàdi Sàtaanà nguvwa uteeta bwà kucintuuta pambidi. Ne paanyimà pàà mèmè mumane kafila Rebekah wanyì mukesè ewu mu kàlaasà mu dindà emu, kadi mu njila wa dyalukila amu, mèmè kubanga kukàngula cyàkàbìdì cisanji aci; ki mèmè kudyàmbidila ne mvwa mufwànyine kabwela cyàkàbìdì mu bintàkanyì abi, pa nànkù mèmè kucikànga cyàkàbìdì.

Nènkù pámvwà ngenda mbànda ne mùsèèsù, Sàtaanà kungambilayè, wàmba ne: “Utukù mumanye ne mwine Muntu unùdi nubiikila ne n’Yesù ewu ùvwà muntu ànu mùdì, dingingà ditùkù mu matùkù Èndè amu, mùdì Billy Graham anyì Oral Roberts mu anyi? Ùvwà ànu muntu wetù ewu uvwàbò babangè kukungwija ndambù wa bantu bàMunyùngulukila ne bàmba ne Yèyè m’Muntu munène, ki paanyima pàà cikondo kulwaYè mutàmbe bunène, ne pashìishe kulwaYè nzambì kampàndà—kampàndà bwàbò bóbò. Ne patùdi twakulangana apa cikaadi citangàlàke buloba bujimà, kacya ànu pààkafwàYè apu, ki kwàjiki’s.”

²¹ Mèmè kudyàmbidila ne: “Wèwè kadi ki mwena mashimi wètù wa!” Ki pashìishe mèmè kukùdimuka bu mùmvwà nsambuluka njila wa Graham Street. Mèmè kwamba ne: “Sàtaanà, wèwè udi wakula ne kondo kàànyì kàà munda awu, ndi muswè nkukonkèku ndambù wa bintu: Uvwà baprófeta bàà beena Ebèlù bàmba ne ùvwà ne cyà kulwa awu nganyì? Maasiyà mwela maanyì awu ùvwà nganyì? Cìvwà pambidi pàà bantu bààkadyànjilà kuMumòna ne kwambabò bwà nsòmbelu Wendè, bidimu binunu kumpàlà kwà kulwaYè pànwapa aci cìvwà ncinyì? Nganyì uvwa mudyànjile kucyàmba ànu mu cyòci awu? Ne pààkalwàYè, bóbò bàvwà bambè ne: ‘Wàkabadiibwa munkaci mwà bashipi bàà mikenji,’ ne Yèyè kubadiibwamù. ‘Wàkatàpiibwa mpùtà bwà dishipa dyètù dyà mikenji,’ ne kutàpiibwaYè. ‘Wàkapeta Lwèndè lukita pàmwè ne babanji, kadi Ùvwà mwà kubiika ku lufu, mu ditùkù diisàtù,’ ne kubiikaYè. Ne pashìishe Yèyè wàkalaya Nyumà Mwimpè, ne mèmè ndi muMupete. Pa nankù’s mbipicùibwe ne wèwè muumùkeKù, bwalu mbifundùibwe mu Díyì, ne Díyì dyònsò ndilelèlè.” Dìbà adi ki yèyè uyàaya wàwa. Mupèèshè wèwè ànu Díyì, bwalu bùdi bùtùuka. Kèna mwà kutwila Díyì adi nkànanà

to, bwalu Dyôdi ndisonsola.

Tùbangilàayi kubala dilòlò edi mu nshapità wa 7 wa Mukàndà wà Byenzedi.

Nènku mwakwidi munène wàkamba ne: Maalu aa àdi nàнку anyi?

Nènku yéyè wàkamba ne: Balùmyànà ne bânà bèètù, ne baatààtù, tèèlejàayi; Nzambi wa butùmbi wàkamwènekela taatù wetù Abraham, pàvwàye ùsanganyìbwa mu Mèzòpòtaamìyà, kumpàlà kwà kusòmbelayè mu Haalànà,

Ne wàkamwambila ne: Pàtukà mu ditùnga dyèbè, ne mu cifuku cyèbè, nènku ulwe mu buloba bùngààkuleejà mèmè abu.

Ki kupàtukayè mu buloba bwà beena Kaasàdà, ne kusòmbelayè mu Haalànà: ne kubangila apu, pààkafwà tatwèndè, yéyè kumumusha ne kumubwejayè mu buloba ebu, munùdi nwènù basòmbèle mpindyewu emu.

Kadi yéyè kààkamupèèshamù bumpyànyì nànsha bùmwè to, to, nànsha mene mwaba wà kutèèkelayè dikàsà: kadi yéyè wàkamulaya ne ùvwa mwà kumupèèshabù bu bwèndè yéyè, ne dimiinu dyèndè paanyimà pèndè, piine apu mpàciwàye kàyi mwanji kwikala ne mwànà nànsha umwe to.

.. Nzambi wàkaakula mùshindù ewu ne: Dimiinu dyèndè ùvwa ne cyà kwanji kusòmbela mu buloba bwenyi; ne bôbò nebàbàbwejè mu bupika, ne nebàbàkèngèshè bibi be munda mwà bidimu nkàmà yinaayi.

Kadi ditùnga dyàshààlào mu bupika adi mèmè nèndilumbùlwishè, mùdi Nzambi wàmba, ne paanyimà pàà cyôci aci bôbò nebàpatukè, ne nebànkwàcìlè mudimu mu ditùnga edi.

Nènku yéyè wàkamupèèsha cipungidi cyà ditengudiibwa: nènku Abraham wàkalela Izàkà, ne wàkamutengula mu ditùkù dyà mwandamukùlù; ne Izàkà wàkalela Yakòbò; ne Yakòbò wàkalela bankambwà dikumi ne babidi.

²² Pa kòkò kaaba aka, tudi baswè kulenga cyena-bwalu, cìndi mèmè ngeela meeji ne ncyena-bwalu cyà pabwàci bwà ditùkù edi, cyà... *Nyumà Mwîmpè Ncinyi?* Yéyè ùdi cinyi? Nènku, mpindyewu, kabingilà kàndi mwangàcile byena-bwalu ebi biikàle bilondangana mùshindù ewu, kwèna mwà kulwa kupeta Nyumà Mwîmpè paùdi kùyì mumanye cìdiYe to. Ne kwèna mwà kuMupeta, pawikalà mumanye cìdiYe, paùdi kùyì mwitàbùuje ne mMukupèèsha, ne Yéyè ngwebè wèwè to. Ne, pashiishe, kwèna mwà kumanya ní udi Nèndè, anyi to, paùdi kùyì mumanye

bipeta bìdìYe ùtwàla to. Pa nànkù wêwè mumanye cìdìYe, ne Yéyè ùdi bwà nganyi, ne cyenzèdi cìdìYe ùtwàla pàdìYe ùlwa, dībà adi neùmanya cyùdi naacì paùdi uMupeta. Nwamònu anyi? Ànu aci ncìdi cifwànyine kukòsa bwalu.

²³ Ànu mùmvwà ngaakula ne Mwanèètù Jeffries leelu ewu, ne yéyè kwamba ne: “Mvwa muswè kwikala mu disangisha dilòòlò edi, kadi nēngiikalēmu mààlabà dilòòlò.” Kāvwa mumanye ne masangisha àkaavwa munkacì mwà kwenzeka to, mbwalu katùvwa baàfidile dimanyisha to; ànu kaaba aka mene. Bàmwè bàà ku. . . Mwanèètù Leo ne bakwàbò bàvwa bafùndile bàmwè bàà ku balunda bèètù ne babàmbile, bàà pambelu pàà cimenga. Èè, mbwalu katùvwa ne mwaba to.

²⁴ Mpindyewu mēmè kwamba ne: “Mwanèètù Jeffries, bu wêwè mwà kuntùma bwà kuteemesha wùmwe wà ku myòteelà yèbè yà mpiitùloolù, pàànyì nciyi mumanye kantu nànsha kàmwe pa bwalu abu to, s’ndi pàmwàpa mufwànyine kuwùtudisha ne kapyà. Ndi mufwànyine kuya kanyùngulula nsapì udi kàyì yéyè to anyi kuteemesha mòteelà wùdi kawùyi wòwò to. Bìvwa bikèngela mmanye mwà kucyènza kumpàlà kwà mēmè kucyènza.”

Nènku ki mùdìbi nànkù ne kupeta kwà Nyumà Mwìmpè. Bikèngela ùmanyè cyùdi uwila, ne mwà kuMupeta, ne cìdìYe ciine.

Mpindyewu, cyàkumpàla, Nyumà Mwìmpè ùtu mulayìibwe.

²⁵ Tudi bafwànyine kwangata mbingu dikumi kadi katùyikù. . . kulenga cyena-bwalu eci ànu pamutùpamutù, cidi Nyumà Mwìmpè wikalangana aci. Kadi, cyàkumpàla, ndi muswè kucilenga ànu mu mùshindù mukùmbàne menemene bwà kufila cikòsò ku dilòlò ne ku dilòòlò dyònsò, pashiishe kumòna dilòòlò didi dilondà ní kùdi nkonko.

²⁶ Mbanganyi mwaba ewu bàtù kabàyi bapetè Nyumà Mwìmpè, kabàyi babàtìijìibwe ne Nyumà Mwìmpè? Elaayi byanza muulu, pawikalà mumanye ne kùtu mubàtìijìibwe. Anjì tângilàayi anu byanza.

Mpindyewu ndi muswè kwakulaPù, pa Nyumà Mwìmpè mwikàle cimanyinu, bwalu Yéyè ùdi cimanyinu. Tudi bamanyi ne—ne milayi yònsò mmitùpèèbwe ku. . . Abraham nguvwa taatù wa mulayi, bwalu Nzambì wàkapèèsha Abraham ne Dimiinu dyèndè paanyimà pèndè mulayi. Mulayi wàkafidiibwa “kùdi Abraham ne kùdi Dimiinu dyèndè.” Ne cyòci cimanyinu eci cidi bwà cisàmbà cyà cipungidi.

²⁷ Mpindyewu, kùdi dishiilangana dinènaanènàalè pankaci pàà mwena Kilistò wa pàtupù ne mwena Kilisto muujìibwe tètè ne Nyumà Mwìmpè. Nènku mpindyewu netùpetelè cyòci eci ku Mifùndù, ne kucitèèka ànu menemene mu Mifùndù. Cyàkumpàla, kùdi mwena Kilistò udi ujikula wamba mùdiye mwena Kilistò. Kadi mwine mwena Kilistò ewu yéyè kàyì

mwanji kuujiibwa tètè ne Nyumà Mwímpè to, yéyè ùdi ànu mu njila mutàngile ku diikala mwena Kilistò. Nwamònu anyi? Yéyè ùdi ùjikula wàmba mùdiye muMwitabuuje; yéyè ùdi ùdyènzeja bwa kuKùfika, kadi Nzambi kî mmwanji kumupèèsha mwine Nyuma ewu to, Nyuma Mwímpè ewu. Kî mmwanji kufika ku kiipàcìlà aku ne Nzambi to, bwà ne Nzambi wácìtábi.

²⁸ Bwalu, bidi ne, Nzambi wàkenza cipungidi ne Abraham, paanyimà pàà Yéyè mumane kubìikila Abraham, cidi cifwànyikijilu cyà dibìikila dyà mwena kwitabuujja leelu ewu.

Yéyè wàkabiikila Abraham, ne Abraham wàkapàtuka mu ditunga dyàbò ne wàkaya mu buloba bwenyi, bwà kusòmbayè munkaci mwà bantu beenyi, ne cyòci aci cìvwa cifwànyikijilu cyà pàdi Nzambi ùbiikila muntu bwà kulekelayè maalu èndè a ciipaanshi, bwà kunyingalalayè ku mpèkaatù wendè. Ùdi dîbà adì ùkùdimuka ùshiyangana ne musùmbà wà bantu mùvwàye usanganyiiibwa, bwà kusòmbelayè mu musùmbà mupyamùpyà, munkaci mwà bantu bàà mùshindù mupyamùpyà.

Nenku dîbà adì paanyimà pàà Nzambi mumane kusangana ne Abraham ùvwa ne lulamatu ku mulayi wùvwa Nzambi mumupèèshe, wà ne yéyè neàpetè mwànà awu, ne ku mwine mwànà ewu buloba bujimà bùvwa mwà kubèneshiiibwa, dîbà adì Nzambi kushindikaYè diitabuujja dyèndè pa kumupèèsha cimanyinu, ne cimanyinu aci cìvwa nditengudiibwa. Ne ditengudiibwa ncifwànyikijilu cyà Nyumà Mwímpè.

²⁹ Ànu mvensa mene yidì yilondà yà nshapità utùdi tufùma ku dibala ewu, panwìkalà baswè kumufùnda. Ne... Stèfanò wàkamba, mu mvensa wa 51 ne:

Nwènu beena nshingù mitàndàbàle... bàdi kabàyi batengula mu myoyi ne mu maci, nudi misangu yònsò ànu nukàndameena Nyumà Mwímpè: mwàkenzà baataatù beenu, ki munùdi nwènu nwenza.

³⁰ Ditengudiibwa ncifwànyikijilu cyà Nyumà Mwímpè. Nenku Nzambi wàkapèèsha Abraham cimanyinu cyà—cyà ditengudiibwa paanyimà pàà yéyè mumane kwitaba Nzambi ku mulayi Wèndè ne mupàtùke mukabwelè mu ditungà dyenyi. Nwamònu anyi? Cìvwa ncimanyinu.

Ne bânà bèndè bònsò, ne dimiinu dyèndè paanyimà pèndè, bàvwa ne cyà kwikala ne cimanyinu eci mu mubidi wàbò, bwalu cìvwa nditàpulula. Cìvwa mbwà kubàtàpulula ne bikwàbò bisàmbà byònsò, cimanyinu cyà ditengudiibwa eci.

³¹ Ne cyòci aci ki cidi Nzambi ùkwàta naaci mudimu leelù ewu. Ncimanyinu cyà ditengudiibwa dyà mwoyi, Nyumà Mwímpè, cidi cìvwijà Èkèleeziyà wa Nzambi Èkèleeziyà mutàpùlùke ne twitabààyi, miitabuujja ne màngumba makwàbò ónsò. Bàdi bàsanganyiiibwa mu màngumba a mishindù yònsò, kadi bàdi cisàmbà citàpùlùke. Lekà nyiikilè ànu ne muntu tusunsa tùbidi, ndi mwà kukwambila ne mmupete Nyuma Mwímpè anyi kî

mmupete; udi pèèbè mwà kwenza nànkú. Ûdi ùbàtápulula. Ncimwènenú. Ncimanyínú. Ne Nyumà Mwímpè ncimanyínú. Ne cìdì . . .

Mwànà kanà yònsò úvwa ubènga ditengudiibwa mu Dipungila Dikùlukulu, diine divwà mundidimbì wà Nyumà Mwímpè adi, ùvwa ùmushiibwa munkaci mwà cisàmbà. Kàvwa mwà kwikala mu bwobùmwe ne bakwàbò bàà mu disangisha to, yèyè mubènge kutengudiibwa.

Mpindyewu fwànyikijààyaaku aci ne leelù ewu. Muntu udi mufwànyine kubènga bwà kupeta dibàtiiza dyà Nyumà Mwímpè awu, kèna mwà kwikala mu bwobùmwe nànsha bukesè to munkaci mwà aba bàdì ne Nyumà Mwímpè. Kwèna ànu mwà kucyènza to. Bikèngela nwikalè ne ngiikàdìlu wa mwomùmwe. Bu mùdì, cìdì . . .

³² Màmù wanyì udi pààpa wàwa ùvwa ne ciibidilu cyà kwamba ne: “Pàdì tutendè tütwilanganga ki pàditu tütèdangana.” Ee, ndusùmwinù lwà kale, kadi ndulelèlè. Kanùtu numòna nyuunyi yà nkuci ne bikòlòlò bisòmba mu bwobùmwe to. Ndìilù yàyì mmishìilàngàne. Biibidilu byàyì mbishìilàngàne. Majinga ààyì mmashìilàngàne.

Neuku ki mùdìbi ne bàà pa buloba ne mwena Kilistò paùdì *mutengùdiibwe* kùdì Nyumà Mwímpè, cìdì cyùmvwija ne, “kukòsa musòsò.”

³³ Ditengudiibwa divwa mwà kwenjiibwa ànu kùdì muntu mulùme. Kadi mukàjì yèyè musèdiibwe kùdì mulùme, mukàjì awu ùvwa citùpà cyèndè, yèyè ùvwa mutengùdiibwe mu mulùme. Nudi bavùlùke, mu Tiimòtè, mwaba wùdì Cì cyambe muntwamu ne: “Kàdì neàsungidiibwè mu kulela kwèndè kwà bânà, yèyè mutùngùnùke mu diitabuuja ne cijila pàmwe ne dicincika dyònsò dyà maalu.”

³⁴ Mpindyewu, ditengudiibwa. Nudi bamanyè pàdì . . . Sarah wàkaseka mu ntentà paanyimà pèndè, ku mukenji wà Mwanjelo awu, pàakambàye ne: “Abraham,” kàyi mumanye ne yèyè ùvwa nganyì to, mwenyi, “mukàjèèbè Sarah, ùdi penyì?” Mmunyi mwàkamanyàYe ne yèyè ùvwa ne mukàjì?

³⁵ Bu mwàkambà Yesù ne: “Anu mwàkadìbi mu matùkù a Lotà, ki mwìkalàbi kàbidì ku dilwa dyà Mwànà wa muntu.” Vùlukààyi ne, bimanyinu abi kabyàkuujiibwa mu Sodomà ne Gomòlà, mu bàà pa buloba, munkaci mwà balongi bàà maalu a ntendelelu to. Kàdì cìvwa bwà Basungula, bàvwa babìikila bwà kupàtuka. Ne Abraham ùvwa mubiikila bwà kupàtuka. Ne mwaku *èkèleeziyà* wùdì wùmvwija ne “babìikila bwà kupàtuka; batàpulula,” mùvwa Abraham muditàpùlùle ne mutengùdiibwe.

Neuku Sarah pàakasekàye mukenji mwine wà Mwanjèlò awu apu, Nzambi's ùvwa mufwànyine kwikala mumushebèye dyàkàmwe; kadi Yèyè kàvwa mwà kwenzela Sarah bibi kàyi

wènzela Abraham bibi to, bwalu bàvwa umwe. Mukàjì awu ùvwa citùpà cyèndè. “Kanùcyèna kàbìdì bàbìdì to, kadi umwe.”

³⁶ Pa nàнку, ditengudiibwa, Nyuma Mwímpè leelu ewu ùdì ùtengula mwoyi. Nenku ncimanyinu, cimanyinu cifidiibwe.

Muntu kampànda ùvwa wàmba ditùkù adi... Ndi ànu ngambulula eci cyanààna, kí mbu bilèlè ngeela to. Bwalu, mbulelèlè, kadi cidi cyùmwika bu ne mbilèlè. Ànu múnkaadi mwambàmbe misangu yàbùngì, ewu kí mmwaba wà dycznzela bilèlè to. Kadi kùvwa keena Allemagne kakwàbò ku Côte Ouest kwàka, kutùdì bafùme ku diya eku. Ùvwa mupetè Nyumà Mwímpè. Nenku ùvwa ùpweka ne musèèsù, ne ùvwa wènda katùpà, wèla byanza muulu wàkula mu myakulu. Ne ùvwa wàsa lubilu, ùtùpika, ne wèla mbilà. Nènku ùvwa ùsanganyiibwa ku mwaba wà mudimu, mutùngùnùke ne kudìtwàla mùshindù awu, kí mfùmwendè wa mudimu kumukonkayè ne: “Ùvwa muyè penyì?” Uh-huh. Mémè ntu munange myaba yiwùdì muyè ayi. Kwambayì ne: “Udi ne cyà kwikala ànu muyè munkaci mwà musùmbà wà bapàle wàwa.”

Yèyè kwamba ne: “Nènku udi wela meeji ne bôbò abu bàdi bapàle anyì?”

Awu ne: “Cyà bushùwà, s’ki cidibo.”

³⁷ Yèyè kwamba ne: “Ee, Mukalenge àtumbè’s bwà bapàle!” Ki kwambayè ne: “Udi mumanye mùdi bwalu anyi? Bapàle’s bàdi bènza mudimu munene.” Yèyè ne: “Cileejilu, màshinyì, umùshà ànu màlù ònsò àdìku awu, wèwè’s udi ushààla ànu ne mushikì wà ‘bilatalata.” Pa nanku aci’s ncyenzè ànu bu cyà bushùwà.

³⁸ Udi mushiilàngàne bikolè pàdì Nyumà Mwímpè ùkupwekela, mu mùshindù wà ne meeji a buloba ebu kaèna àkunangakù to, ne bôbò bàdi bàbèngangana neebè, ne kí mbaswè kwikala neebè bwalu to, nànsha kakesè. Wèwè udi mulediibwe mu Buloba bukwàbò. Udi ànu mwenyi wetù wa menemene ewu, mwenyi misangu dikumi kutàmba ne mùdì mufwànyine kwikala, bu wèwè mwa kuya mu bitùpà byà ku ncyàma menemene byà bisuku ne meetu à mu Afrike. Udi mushiilàngàne pàdì Nyumà Mwímpè ùlwa, ne Yèyè ncimanyinu. Ncimwènenù munkaci mwà bantu.

³⁹ Mpindyewu, wèwè udi wamba ne: “Dìbà adi, Mwanètù Branham, cimanyinu cya ditengudiibwa aci cyàkafidiibwa kùdì Abraham anyì?” Aci ncilelèlè. “Ne kùdì Dimiinu dyèndè anyì?” Eyowa.

⁴⁰ Eyo, mpindyewu netùbuululè mu Ngalàtiyà, nshapità mwi3, mvensa wa 29, bwa kumòna mùdì cyòci aci cifwànyine kwangaciibwa bwètù twètù. Ngalàtiyà 3:29, bwà kumòna ànu mùdì ditengudiibwa edi difwànyine kwangaciibwa bwà muntu wa bàà Bisàmbà byà bendè, piikalàbi ne twètù tudi bàà Bisàmbà byà bendè; bwalu, ku dilediibwa dyà mu bufùki nkutùdì nàнку.

Mpindyewu, dyàmbedi, ndi muswè kubala mvensa wa 16.

Mpindyewu kùdì Abraham ne dimiinu dyèndè nkwakafidiibwà mulayi. (Abraham ne dimiinu dyèndè!)
Yèyè kàakamba ne: Ne mamiinu to, . . .

Ànu mùshindù kanà wònsò wà . . . wàmba ne: “Kaa, mème ndi mamiinu à Abraham, mème pàànyi.” To. Kùdì “Dimiinu,” Dimiinu dyà Abraham!

. . . Kì nkùdi mamiinu to, byenzè bu ne ngààbúngì; kadi mbyenzè bu ne ndimwèpelè ne: Ne kùdì—kùdì àbò . . . Ne kùdì dimiinu dyèbè, didì Kilisto.

⁴¹ Kilistò nguvwa Dimiinu dyà Abraham. Nudi nwtabuujja naàнку anyi? Eyo, mpindyewu twàngatàayi mvensa wa 28 ne wa 29.

Kakwèna nì mmwena Yuda nì mmwena Ngelikà,
anyi kakwèna nì *mmupika* anyi *mudishikàmine*, anyi
kakwèna nì *mmulùme* anyi *mukàjì to*, *bwalu twètù tudi*
bònsò umwe mu Kilistò Yesù.

Nènku nwènù biikàle bàà Kilistò, dîbà adi nudi dimiinu dyà Abraham, ne nudi bapyànyi bilondèshile mulayi.

Tudi tulwa “Dimiinu dyà Abraham munyi”? Mu kwikala mu Kilistò, dîbà adi tudi Dimiinu dyà Abraham. Ne Dimiinu dyà Abraham divwa cinyi? Ànu mùdibi ne, tudi bafwànyine kutungunuka too ne ku Loomò 4 ne myaba mishillèshillàngane.

Abraham kàakapetakù mulayi pàkaavwàye mutengula to. Bwà kuleeja ne ditengudiibwa divwa ànu cifwànyikijilu cyanàana, yèyè wàkapeta mulayi *kumpàlà* kwà kutengudiibwayè. Nènku cívwa ncifwànyikijilu, cyà dyanyishiibwa dyà diitabuujja dyèndè divwàye naadi kumpàlà kwà kutengudiibwayè.

⁴² Mpindyewu, patùdi mu Kilistò, tudi tulwa Dimiinu dyà Abraham ne tudi bapyànyi pàmwè ne Kilistò, nàнку, nànsha twètù biikàle banganyi, beena Yuda anyi bàà Bisàmbà byà bendè.

Nènku, “Dimiinu dyà Abraham,” Dimiinu dyà Abraham didi ne diitabuujja dyà Abraham, didi dikwàcila Nzambì ku Dîyi Dyèndè. Nànsha Dyòdi dimwèka dicimbè munyi, nànsha wèwè wenza maalu mu mùshindù wà pabwàwù bìshi, nànsha Dyòdi dikuvwija wa maalu à wèbè mùshindù à munyi, wèwè udi ukwàcila Nzambi ku Dîyi Dyèndè nànsha kwòkù cinyi.

⁴³ Abraham ne bidimu makumi mwandamutekète ne bitaanu, ne Sarah ne bidimu makumi àsambòmbò ne bitaanu, yèyè wàkakwàcila Nzambì ku Dîyi Dyèndè, ne wàkabiiikila byònsò bìvwà bibènganganà naaDi bu ne kabìvwakù to. Nudikù nwela meeji kaayi, bwà cívwa bangàngàbukà bàà matùkù awu abu badyèléle meeji? Nudikù nwela meeji kaayi bwà cívwa bantu

bàdyèlela meeji, pàvwàbo bà mòna muntu mukùlákàjì, wa bidimu makumi mwandamutekète ne bitaanu, ùya eku ne eku wènda ùtùmbisha Nzambì, ùvwa ne “cyà kupetela mwànà” kùdì mukajèndè, ne yèyè mwikale ne bidimu makumi àsambòmbò ne bitaanu, kumane kupita bidimu bitwè ku makumi àbìdì ne bitaanu byà kaciyi ùtwa paanshi? Kadi, nudi numòna’s, s’cìdì cìkwenzeja maalu a lukutukutu, diitabuuja dyà Abraham adi.

⁴⁴ Nènku paùdì utengudiibwa ku Nyumà Mwímpè, Yèyè ùdì ùkwenza cintu cimwècimwè aci. Ùdì ùkwenzeja bintu byùvwa kùyikù wela meeji ne udi mufwànyine kwenza to. Ùdì ùkufikisha ku dyangata dyà mulayi wà Nzambì ne ku diitabuuja Nzambì.

⁴⁵ Mpindyewu, Ùdì kàbìdì, pa kuumusha mu—mulayi ne cimanyinu, Ùdì kàbìdì citampì. Mpindyewu bu nwènu mwà kuswa kuya naanyi mu Loomò. Dyàmbedi, ndi muswè nùuye naanyi mu Efèsò 4:30, nenku twànji kubalaayi kaaba aka katancì kakesè cyanààna. Efèsò 4:30 ùdì wàmba nùnkù ewu.

Mpindyewu, nukàadi bumvùmvwe bantu bààbùngì bàmba mùdì bintu bishìlèshìlàngàne bikale bitampì. “Wèwè mubwele mu èkèleeziyà, kampànda, udi ne citampì cyà èkèleeziyà awu.” Ne bàmwè bantu bàtu bàmba ne: “Nkuneemekela kwà ditùkù kampànda, ditùkù dyà nsabatu, ki—ki citampì cyà Nzambì.” Bàmwè bàtu bàmba ne: “Twètù batèèke buumambàlà bwètù mu òngumba kampànda, tudi batwìbwe citampì mu Bukalenge bwà Nzambì.”

⁴⁶ Mpindyewu, Bible mmwambe ne: “Dìyi dyà muntu yònsò dìikalè mashimi, kadi dyà Nzambì dìikalè Bulelèlà.” Mpindyewu, Efèsò 4.30 ùdì ùbadiibwa mùshindù ewu:

Nenku kanùbungamiji Nyumà Mwímpè wa Nzambì to, unwàkatwìbwa nendè citampì too ne ku ditùkù dyà bupikudi.

⁴⁷ Nebìkengelè bwà mèmè kushidishakù ndambù pa cyòci eci mpindyewu, kucyàdijakù. Mpindyewu, nwènu bàna bèètù beena ne ànu mikenji nwatùkijaayikù bwà katancì kakesè. Nwamònu anyi? Nukàadikù bamòne ne ciine citampì aci cìdì cìshààla ntàntà bule kaayi anyi? Kì nne too ne ku ditàbuluja didì dìlondà, too ne ku musangu wùdì wùlondà wànyangukà cintu kampànda to. “Too ne ku ditùkù dyà bupikudi bwènù,” ntoo ne ku dìbà adi kunùdì batwìbwe citampì. “Too ne ku ditùkù dyà bupikudi bwènù,” pànwàpikudiibwà ne kasukì bwà kwikala ne Nzambì, mbwà too ne ku dìbà adi kùdì Nyumà Mwímpè ùkutwà citampì. Kì nkuumukila ku ditàbuluja too ne ku ditàbuluja dikwàbò to; kadi nkuumukila ku Cyendèlèlèlè too ne ku Cyendèlèlèlè, kùdì mutwìbwe citampì kùdì Nyumà Mwímpè.

Kì cìdì Nyumà Mwímpè, Ùdì citampì cyà Nzambì, cyà ne Yèyè wàsanganyi. . . wèwè wàpecì ngàsà ku mèsù Kwèndè, ne Yèyè mmukunangè, ne Yèyè mmukwitàbùuje, ne Yèyè wàkutù citampì Cyèndè. Citampì ncinyi? Muntu kanà yònsò ewu. . .

Mòna's, *citampì* cìdi cìleeja anyì cyùmvwija “mudimu mujikija.” Amen. Nzambi mmukusùngile, mukujidile, mukusukùle, mukulengèlèèle, ne mukutwè citampì. Yèyè wàjikiji. Wèwè udi cintu cyèndè too ne ku ditùkù dyà bupikudi bwèbè. Cintu *citwà citampì* “ncintu cijikija.”

Nyumà Mwîmpè ncinyi? Ncimanyinu. Netùfikè pa cyòci aci pashiishe ndambù, mu Diiyiisha dikwàbò, cimanyinu cìdi Pòlo mwambe aci. Myakulu yivwa cimanyinu bwà beena kwitabuuja, anyì, bwà beena bupidyà.

⁴⁸ Mpindyewu mònaayi, kadi, mu cyòci eci, Nyumà Mwîmpè ncimanyinu. Ndi njinga kwamba...Ne Nyumà Mwîmpè ncitampì. Ncimanyinu cìdi Nzambi mupèèshe bânà Bèndè basungula. KuCibènga, nkuumushiibwa ku cisàmbà; ne kuCipeta, nkushiyangana ne maalu a pa buloba ne bintu byònsò byà pa buloba, ne kwikala cintu cìdi Nzambi mutwè citampì cyà dyanyishiibwa.

⁴⁹ Mémè kale wàwa mvwa nkwàta mudimu ku cyapù cyà njila yà njanja eku kwà Harry Waterberry, ne tuvwa tuya kuuja bintu mu dikaadikà. Mwakùnyàànyì wa balùme, Doc, udi mwimane paanyimà pààpa wàwa, ùtu ùkwàcishangana ku dyuja dyà bintu mu màkaadikà. Pàdi dikaadikà munkaci mwà kuujiibwa ne bintu, bàdi bakenketa dikaadikà adi, mukòntononyi's, ne yèyè mupetè cintu cyà citènkakana, cìdi cifwànyine kudishinda ne kukòseka, anyì cintu cìdi cifwànyine kunyangakaja bikwàbò; yèyè kààkukànga dikaadikà adi to ànu too ne piikalà dikaadikà adi dipàya bintu patapata, mu mùshindù wa dipàyibwe bimpè ne mu bulongàme menemene, bwà minyùkunyuku yà mu lwendu kayilu kunyanga bintu bìdi munda amu abi.

⁵⁰ Ki cìdi cyènta ne katwikadi tutàmba kutwiba citampì ncyòci aci; tudi batàmbe kwikala ne madilekelela mu maalu. Pàdi Mukòntononyi ùkenketa, bwà kukòntonona nsòmbelu webè, bwà kumòna ní kwènàku ànu ne tuumadilekelela ndambù mu maalu, tuumadilekelela ndambù pa bìdi bitàngilà nsòmbelu webè wa disambila, tuumadilekelela ndambù pa bìdi bitàngila ciiji aci, tuumadilekelela ndambù pa bìdi bitàngilà ludimi alu, bwà dyakula bwà bakwàbò, Yèyè kààkukàngaku dikaadikà adi to. Biibidilu kampànda byà bukooyà, bintu kampànda byà bibiipe, meeji kampànda à ciipanshi, Yèyè kèna mwà kukànga dikaadikà adi to.

Kadi pàdiye ùsangana bintu byònsò pa myaba yàbi, Mukòntononyi awu, dìbà adi Ùdi ùdikànga. Kadi muntu àdìdìngè ànu àkangulè citampì aci pàdi dikaadikà adi kadiyi dyanji kufika kuyaayadi kùdìbo baditwile citampì aci bwà kafikadi! S'ki cyòci aci. “Kanùlengi beela maanyi Bàanyi to; kanwènzedi bapròfetà Bàanyi bibi to. Bwalu Ndi nzwàmbila ne, bivwa bitàmbe bwîmpè bu bakuswikile dibwe dyà mpelu munshingù, ne bakwinyije mu ndòndò wa màyi a mbù, pamutu

pàà kulendwisha mene anyi kunyungisha ànu kakesè cyanààna ewu udi mutàmbe bukesè wa ku bàdi batwibwe cintampì aba.” Nudi bûmvwe cìdìcì cìswa kwamba anyi?

⁵¹ Ki cìdì Nyumà Mwímpè ncyôci aci. Nditwishibwa dyèbè. Ndikùbiibwa dyèbè. Nntèmù webè. Ncitampì cyèbè. Ncimanyinu cyèbè, cyà ne: “Mémè ndi mu njila mutàngile ku Dyulu. Cìdì dyabùlù wàmba nànsha ciikàle cinyi! Mémè ndi mu njila mutàngile ku Dyulu. Bwa cinyi? Yèyè mmuntwè cìtampì. MmuCimpèeshe. Mmuntwe cìtampì mumbwejè mu Bukalenge Bwèndè, ne ndi mu njila mutàngile ku Butùmbi! Bipeepèlè bituutè, Sàtaanà ènzè cìdiye muswè kwenza aci. Nzambi ùkaadi mumane kuntwà cìtampì too ne ku ditùkù dyà bupikudi bwànyì.” Amen! Ki cìdì Nyumà Mwímpè cyôci aci. Kaa, s’bìvwa bikèngela bwà wèwè kuMujinga’s. Mémè ncyèna mwà kutùngùnuka nciyi Nendè to. Byàbùngì mbifwànyìne kwambiibwa mwaba awu, kàdi ndi mutwishibwe ne nudi bamanyè cìndi ngàmba aci.

⁵² Mpindyewu, kàbìdì, tùbululàayi mu Yone 14, ànu bwà katancì kakesè cyanààna. Mémè ntu munange Dîyi! Dyôdì didi Bulelèlà.

⁵³ Mpindyewu, Nyumà wa Nzambi, Nyumà Mwímpè, Nyumà Mwímpè ncinyi? N’Nyumà wa Kilistò munda mwèbè. Mpindyewu, kumpàlà kwà twètù kubala, ndi muswè kwambakù ànu ndambu wa mèyi a dyela naawu nsèka mwaba ewu. Nyumà Mwímpè ncinyi? Ncitampì. Nyumà Mwímpè ncinyi? Ncipungidi. Nyumà Mwímpè ncinyi? Ncimanyinu. Nyumà Mwímpè dìbà adi ncinyi? Ùdi . . . Nyumà wa Yesù Kilistò munda mwèbè. Nwamònu anyi? “Katancì kakesè,” mwàkambà Yesù, “bàà pa buloba kabààkuMmòna kàbìdì to; kadi nwènù nenùMmònè, bwalu Nèngùikalè neenù, munda mwènù mene, too ne kundeekeelu kwà buloba.” Nyumà wa Nzambi mu Èkèleeziyà Wendè!

⁵⁴ Bwà cinyi? Wàkacyènta bwà cinyi? Aka nkààdyosha pa cyena-bwalu cyà màalabà dilòlò. Kadi Wàkacyènta bwà cinyi? Bwà cinyi Yèyè, bwà cinyi Nyumà Mwímpè. . . Bwà cinyi, Yèyè wàkalwa bwà cinyi? M’Mulwe munda mwèbè bwà cinyi, m’Mulwè munda mwànyì bwà cinyi? Mbwà kutùngunuka ne midimu yà Nzambi.

⁵⁵ “Ntu misangu yònsò ngenza ànu cìdì cisànkisha Taatù Wanyì. Ncyèna mulwè bwà kwenza diswa Dyànyì Mémè mwine to, kàdi dyà Taatù udi muNtùme. Ne Taatù udi muNtùme ùdi Naanyì; ne ànu mùdì Taatù Wanyì muNtùme, ki mùNdì pàànyì nnùtùma.” Kaa, ekèlekèlè! Taatù wàkaMutùma awu, wàkabwela munda Mwèndè. Taatù wàkatùma Yesù awu wàkabwela munda Mwèndè, kukwàcilaYè mudimu munda Mwèndè.

Yesù udi ukutùma awu, ùdi ùya neebè ne ùdi munda mwebe. Ne piikalà Nyumà awu, uvwa musòmbèle munda mwà Yesù Kilistò, wàkaMwenzeja bintu ne kumwenzeja maalu

mwâkenzàYe amu, wêwê's neùpetè cingènyingenyi cyà mùshindù wènzàYe pààsombelàYe munda mwèbè, bwalu Mwoyi awu kawèna mwà kushintulukakù to. NeWùye kuumuka ku mubidi kuya ku mubidi mukwàbò, kadi kaWèna mwà kushintulula ngiikàdi waWù nànsha, bwalu Wòwò awu wùdi Nzambi.

⁵⁶ Mpindyewu mu Yone 14, twánjì tùbalàayi ànu kakesè, tubangila ku mvensa wa 10.

Udi witabuuja . . . ne mèmè ndi munda mwa Taatù, ne Taatù ùdi munda mwànyì anyi? byenzedi . . . mèyì àndi nnwàmbila ncyèna ndyàm bilawù to, kàdi Taatù udi musòmbele munda mwànyì, yéyè ngudi wenza byenzedi.

Anji elàayibi meeji ku bwalu abu. Mpindyewu:

Ngiitabùùjaayi ne mèmè ndi munda mwa Taatù, ne Taatù ùdi munda mwànyì: anyì ngiitabùùjaayi nànsha bwà byenzedi mene.

Bulelèlà, bulelèlà, nyawu nnwàmbila ne: Ewu udi ungiitabuuja, byenzedi bìndì ngenza neàbyènzè yéyè . . . pèndè; ne neènzè byenzedi binene bitàmbe ebi; bwalu ndi nya ku Taatù.

Kanwènaayikù numòna anyi? Nudi numòna mùdiYe mwambe mwaba awu anyi? Mpindyewu tàngilàayi eci, mùdi eci cipátuka. Nèmbalè mpweké ànu too ne kwinshi ndambù. Nètùpweké ne kubala too ne ku mvensà wa 20. “Ne cyònsò cinwàlòmbà mu . . .” Tùmonèbi, mvwa ne . . . Èyowà. Uh-huh. Èyo.

Ne cyònsò cinwàlòmbà mu dìnà dyànyì, mèmè nèncyènzè, bwà Taatù kutùmbishiibwayè mu Mwànà.

Nwènú balòmbe cintu kanà cyònsò mu dìnà dyànyì, mèmè nèncyènzè.

Nwènú bannangè, lamàayi mèyì àànyì matùma.

Nèнку mèmè nèndombè Taatù, (tàngilàayi mpindyewu) ne yéyè neànùpèèshè Musàmbi mukwabo, bwà yéyè kushàala neenù kashidi;

Nyumà wa bulelèlà mene; udi bàà pa buloba kabàyi mwà kupeta to, bwalu kabèèna bàmumòna, anyì kabèèna bamumanyè to: kàdi nwènú nudi bamumanyè; bwalu yéyè mmusòmbe neenù, ne neikalè munda mwènú.

⁵⁷ Dìbà adi Nyumà awu nganyì? Nyumà Mwímpè ncinýì? N’Kilistò munda mwèbè. Musàmbi awu, ki Nyumà Mwímpè. “Ne piikalà Musàmbi awu mulwè, Yéyè neènzè bintu bimwebimwe bìNdi Mèmè mwenzè pàdi Musàmbi munda Mwànyì apu abi. Nèndombè Taatù, ne Yéyè neànùpèèshè Musàmbi ewu. Nwènú nudi bamanyè Musàmbi awu. Bàà pa buloba kí mbaMumanyè to, kabàadyàkuMumanyakù to. Kadi nwènú nudi baMumanyè

bwalu Yèyè mmusòmbè neenù mpindyewu,” Yesù ngudi wakula awu, “kadi Yèyè neikalè munda mwènù.” Ki bwalu mbwòbù abu’s, ki Musàmbi awu, “neikalè munda mwènù.”

Ncyàkunùshìya kanùyì busàmbi to: mèmè nêndwe kunùdì.

“Ncyàkunùshìya . . .” Mpindyewu, ki Musàmbi awu, Kilistò. Ki cidi Nyumà Mwîmpè ncyòci aci, n’Kilistò.

Kàdi katanci kakesè, bàà pa buloba kabàakummòna kàbidì to; kàdi nwènù nenùmmònè: bwalu ndi ne mwoyi, nwènù . . . nenuikalè pèenù ne mwoyi.

58 Kaa, tudi bafwànyine kutùngunuka ne kwenda kuya kwenda kuya; kadi, mbwà kunuleeja’s. Yèyè ùdi cinyi? Yèyè nçitampì. Yèyè ncimanyinu. Yèyè m’Musàmbi. Nudi numòna byònsò bidìYe abi anyi? Dimiinu dyà Abraham didi dìBipyàna.

59 Mpindyewu túsanganàayi kàbidì ne . . . cikwàbò cidi Musàmbi awu. Tùyaayi mu Yone wa Kumpàla 16.7, bwà tùmònèbi Yèyè ní kèna kàbidì Mutwàkwidi. Nudi bamanyè cidi mwàkwidyanganyi, ùtu wàkwilangana. Tudi ne Mutwàkwidi. Tudi bamanyè aci. Yone wa Kumpàla nshapità wa 16 . . . Kaa, anjì indilaayibi kakesè, nùmfwilèku luse. Cidi, n’Yone Munsantu, 16.7. Nùmfwilèku luse. Nùmfwilèku luse cyà bushùwà bwà pàndi mwambe aci. Ndi mucibalè bibì pa dibeji dyànyì . . . mwangàte 16:7.

Kadi ndi nnwàmbila bulelèlà; Mbîmpè bwenu nwènù nye: bwalu mèmè nciyi muye to, Musàmbi kàakulwa kunùdì to; kàdi mèmè muumùke muye, nêmmutùmè kunùdì.

Nènku pùikalàye mulwe, neàtwishè bàà pa buloba bwà mpèkaatù, ne bwà bwakàne, ne bwà cilumbulwidi:

Bwà mpèkaatù, bwalu ki mbangitabùùje mèmè to;

Bwà bwakàne, bwalu ndi nya ku Taatù, ne nwènù kanwakummòna kàbidì to;

Bwà cilumbulwidi, bwalu mfùmù wa buloba ebu wàmanyi kulumbulwishibwa.

60 Ekèlekèle! Mpindyewu, Mwakwidyanganyi, udi ùsanganyibwa mu—mu Yone wa Kumpàla 2:12 awu. Mpindyewu tùbalàayi aci, katanci kakesè cyanàànà, Yone wa Kumpàla 2:12. Ndi nnùlòmbakù luse, Yone wa kumpàla . . . 1 ne 2, èyo. Ndi mubifunde byòbì ebi, Yone wa Kumpàla 2.1 too ne ku 2.

Bànà bàànyì bakesè, ndi nnùfùndila maalu aa, bwa kanwènji mpèkaatù to. Kadi muntu yèyè mwenzè mpekaatu, tudi ne mutwàkwidi kùdì Taatù, Yesù Kilistò mwakàne:

Mutwàkwidi awu nganyi? Yesù Kilistò mwakàne.

Ne yêyè ngudi—yêyè ngudi mulambu wà kujìmija naawù mpèkaatù yetu: ne kawuyi ànu bwà yetù nkààyaayi to, kadi bwà mpèkaatù yà bàà pa buloba bujimà kabidi.

⁶¹ Nyumà Mwîmpè ncinyi? M’Mutwàkwidi. Cìdì cyenzabo kùdì. . . Mutwàkwidi nganyi? CìdìYe wènza ncinyi? Ùdi wàkwilangana. Ùdi ne luse. Yêyè, Ùdi wìmana pa kaaba kèèbè. Yêyè, Ùdi wènza bintu byùdi wèwè kùyì mwà kwenza to. Yêyè, Yêyè ùdi—Yêyè ùdi mulambu wà kujìmija naawù mpèkaatù yèbè. Yêyè ùdi bwakànè bwèbè. Yêyè ùdi dyondopiibwa dyèbè. Yêyè ùdi Mwoyi wèbè. Yêyè ùdi dibiishiibwa dyèbè dyà ku lufu. Yêyè ùdi byònsò bìdì Nzambì naabi bwèbè wèwè. Yêyè ùdi Mutwàkwidi.

⁶² Mùshindù mwine wutùdì bafwànyine kubwela mu tusùnsudi ne cyôci aci kadi kubyàmba ku kantu ku kantu, mùdìbi ne pàdì Yêyè—Yêyè wènza dyakwilangana bwà dipanga dyètù. Misangu mikwàbò pàdì. . .tudi ne Nyumà Mwîmpè, mu dipanga biikàlè tutetuka tukadyèla mu cintu kampànda. Nyuma Mwîmpè ùdikù bwà kutwàkwila. Yêyè m’Mutwàkwidi. Ùdi ùtwimanyina. . .Yêyè ùdi Mutùlumbulwidi. Ùdi wìmana mwaba awu ne ùlumbulula cilumbù cyètù.Twètù katwena tudilumbulwila cilumbù to, bwalu Nyumà mwîmpè munda mwètù ùdi ùtùlumbulwila cilumbù aci. Nyumà Mwîmpè ùdi wàmba méyì, mîngà misangu mu myaku yùdì wèwè kùyì mwà kuumvwa to, kadi Yêyè ùdi wènza ditwàkwila pa kaaba keetù. Ki cìdì Nyumà Mwîmpè ncyôci aci.

⁶³ Pàndì ngènda nkadyèla mu cintu kanà cyònsò, mèmè—mèmè ndi ngenda mùdì mwànà mukèsè amu; wèwè udi wenda mùdì mwànà mukèsè. Twètù, tudi twenda pa buloba bwà mîdima bùle tètè ne beena lukunà, bùle ne mpèkaatù, bùle ne matèyi, bùle ne bintu byònsò.

Wèwè udi wamba ne: “Kaa, ndi nciina. Ndi nciina bwà kwangata nsòmbelu wa bwena Kilistò. Mèmè, ndi nciina bwà kwenza *cikampànda*. Ndi nciina bwà kwenza *cikansanga*.”

Kùcìinyi to. Tudi ne Mutwàkwidi. Amen. Kaa, Yêyè mmwimane ku luseke lwètù. Yêyè ùdi munda mwètù, ne Ùdi ùtwàkwila. Nyumà Mwîmpè, dìbà dyònsò, dìbà dyònsò mwikàlè ùtwàkwila, dìbà dyònsò edi. Yêyè m’Mutwàkwidi. Kaa, mùshindù mwine wutùdì twela Nzambì twasàkidila bwà cyôci aci’s wè!

⁶⁴ Cìtampì, cimanyinu, Nyumà wa Mwoyi, Nzambì wa mu Dyulu, Musàmbi, Mwoyi, Mwàkwidyanganyi. Yêyè ùdi cinyi? Kaa, ekèlekèlè! S’tudi bafwànyine kutùngunuka naaci kwenza mèbà ne mèbà.

⁶⁵ Mpindyewu netwǎnjì kushintululakù bwà katanci kakesè cyanàana. Mpindyewu netwikalèku mwà kulòmba mpindyewu. . .

M'Mutùlaya mu matùkù a ndekeelu! Mutwàkwidi ewu, cìtampì, mulayi, byònsò bitwám̄bì Bwendè Yèyè dilòlòlò edi abi, ne bikwàbò búngì bupìte misangu cinunu, Yèyè wàkafidiibwa bu mulayi kutùdì mu ditùkù dyà ndekelu.

Kabàvwa Nendè mu ditùkù adi to. Bòbò bàvwa ànu ne cìtampì mu mubidi wàbò, bu cishìndiki ne cimanyinu, biikàle biìtabuuja ne Yèyè ùvwa ùlwa, ne bàvwa bènda mu mundidìmbì wà mikenji. Bwalu, bàvwa batengùdìibwe mu mubidi.

⁶⁶ Leelu ewu twètù katwèna twendela mu mundidìmbì wà mikenji nànsha. Tudi twenda ku bukolè bwa dibìikà dyà ku lufù. Tudi twenda ku bukolè bwà Nyumà, Yèyè udi cìtampì cyètù cilelèlè, Mutwàkwidi wetù mulelèlè, Musàmbi wetù mulelèlè, cimanyinu cyètù cilelèlè cyà ne tudi baleedìibwe ku Dyulu; bantu bàà maalu mapangákàne, bàà pabwàbò, bènda maalu a wàbò mùshindù, bàkwàcila Nzambì ku Díyi Dyèndè, bàbiikila bintu bikwàbò byònsò ne mbyà mafi. Díyi dyà Nzambì ndidì dilelèlè. Aci's ki cìdì . . . Kaa, ekèlekèle! Aci's ki cìdì Nyumà Mwímpè.

⁶⁷ Nudi nuMujinga anyi? Kanwènaayikù banange bwà kuMupeta anyi? Tùmonàayibi yèyè ní mMulayiibwe.

Mpindyewu twàlukilàayi ku Yeshàayi, ku Mukàndà wà Yeshàayi. Twàngatàayi nshapità wa 28 wa Yeshàayi. Mpindyewu tuyàaya mu Yeshàayi 28, ne netùbangilè lwà ku . . . Twàngatàayi mvensà wa 8, bwà kumòna cidi Yeshàayi mwámbe, bidimu nkàmà mwandamutekète ne dikumi ne bìbidì kumpàla kwà kulwaYè.

⁶⁸ Tudi bafwànyine kwamba byàbúngì pa bwalu ebu, kwalukila, kwalukila ànu paanyimà bikolè, kadi netùbangilè ànu kaaba aka bwà kumòna ní mbaMulayè Èkèleziya. Nditùkù kaayi òvwaYe ne cyà kulwa? Mu matùkù a ndekeelu, pàvwàku mwà kwikala di—dinyanguka. Mpindyewu vùlukàayi ne, mwàku awu wùdì ku búngì ne, “matùkù,” matùkù àbidì à ndekeelu, bidimu binunu bìbidì byà ndekeelu.

Mpindyewu, mpindyewu mvensà wa 8.

Ônsò, *bwalu mèèsà ònsò mmùle tètè ne . . . bukooyà, mu mùshindù wà ne kakwènakù mwaba mukezùke nànsha wùmwè to.*

⁶⁹ Kenkètaayi myaba yònsò leelu ewu bwà kuwùpeta. Tàngilàayi myaba yònsò bwà nùmonàayi nì tudi mu ditùkù adi. “Mèèsà ònsò!” Mona's, bàyaaya ku Mèèsà a Mukalenge, ne cintu cyà kumpàla, ku luseke lwà mubidi, bàdi bàngata kapese kàà dyàmpà kapeepèle anyi cisùkwitá cyà mukèlè, bàkàcibula ne bènda kòòmuniyò. Kadi pààbì, cidi ne cyà kwenjiibwa ne byanza byà Nyumà Mwímpè, ne dyàmpà dyà kadìyi dyela lwevènyà. Kilistò kèna ne manyaanu ne bukooyà to, ne cyòcì aci cidi cìMuleeja Yèyè.

⁷⁰ Cikwàbò cintu, bàdi bàcìpèèsha bantu bàdi bànwa maalà, bàshima, bìiba, bànwa mfwankà, bàcyànkunya mfwankà, (yoyöyò!) ànu cintu kanà cyònsò, bu mùdìbì ne bòbò mbàà mu èkèleeziyà. Kabyènzekikù nànkù to! Muntu yéyè ànu mudìdinge mubyàngate patùdì tudyà cyòci eci apa, ùdì wèyela ne ùnwa dipiilà dyèndè yéyè mwine, kàyi ùjingulula Mubidi wà Mukalenge to. Yéyè kàyi ne nsòmbelu awu to, àdìsàkè kule naabi.

Kadi wèwè kùyi ubyàngata to, cìdi cìleeja ne kondò kèèbè wèwè mwine kàà mwoyi nkapìile. “Ewu udi kàyi ùdya to, kèna Naanyi mu bwobùmwe to,” mùdi Yesù mwàmbe.

⁷¹ Kadi mèèsà ònsò a Mukalenge àkaadi mùle tètè ne bukooyà. Kakwèna kaaba kakezùke nànsha kàmwe to. Tèèlejàayi, piikalà aci kaciyi cimfwànyi cyà leelu ewu!

Nganyi wìkalayè . . . nganyi wìkalayè mwà kulongesha dimanya? ne nganyi wàfikishayè . . . ku dyumvwa dilongesha? . . .

. . . nganyi ùmvwa dimanya? . . . nganyi udiyè mwà kufikisha ku dyumvwa dilongesha? . . .

“Ee, Nzambi àbeneshiibwè, mèmè ndi Presbytérien. Mèmè ndi Méthodiste. Mèmè ndi mwena Mpenta. Mèmè ndi Nazaréen. Mèmè ndi Pèlerin de la Sainteté.” Bwà Nzambi aci kaciyènakù ne cìdici cyùmvwija to; cìdi ànu mmèsà makwàbò.

. . . nganyi ùngààfikishàku ku dimanya dyà dilongesha? . . .

⁷² Ndilongesha dyà mùshindù kaayi diine adi; dyà ba-Méthodistes, dyà ba-Baptistes, dyà ba-Presbytéiens, dyà beena Mpenta anyi? Dilongesha dyà Bible!

. . . nganyi ùngààfikishàku ku dimanya dyà dilongesha? . . .

⁷³ Udi umanya munyi paùdì Nendè? Aci netùbwelèmu mu diitànù dilòlò. Nwamònu anyi?

. . . nganyi ùngààfikishàku ku dimanya dilongesha? (tàngilààyaaku mpindyewu) aba bàdìbo baleekèèshe mabèèle, babùmùshe ku dibèèle.

⁷⁴ Bàna bakesè bàdi bàmba ne: “Èè, mèmè ntu nya mu èkèleeziyà, maman wanyi ùvwa wa mu èkèleeziyà ewu.” Ncyèna ne bwalu nànsha bùmwe bwà búbèngangana ne aci to, mwanèètù munanga. Ne ndi mumanye ne eci bàdi munkaci mwà kucikwàta pa mikaba. Abi bìdi anu bìmpè, ikalà wèwè wa mu èkèleeziyà wa maman. Kadi, tèèlejà ne, maman wàkendela mu bukènkè kampànda, wèwè udi wendela mu bukwbò pààbù.

⁷⁵ Luther wàkendela mu bukènkè kampànda; Wesley wàkendela mu bukwbò pààbù. Wesley wàkendela mu bukènkè kampànda; Mpenta wàkendela mu bukwbò pààbu. Kadi twètù

leelu ewu tudi twendela mu bùdi butùmbùke kutàmba abu nàнку. Ne kwòkù lukòngò lukwaàbò, nelùye kutùtàmba twétù.

⁷⁶ Mu matùkù a kale, pàvwà cintu aci cyalàbàle, cyalàbàle menemene, Luther wàkalongesha dibingishiibwa ku diitabuujà. Aci cìvwa ànu bwà kuumusha bantu mu cyena Katolike bwà kubàbweja mu cyena Mishòònyì, mu bwobùmwe banyùngùlùkile Diyì. Dibingishiibwa ku diitabuujà, aci cìvwa ncipaapu cinène ne cyalàbàle. Bòbò kabààkuumukakù apu nànsha.

⁷⁷ Pashìishe kulwakù ditàbuluja dikwàbò bàdìbìikila ne n'John Wesley. Dyàkabànyùkusha e kubùumusha ku aci nàнку, ne kumufikisha ku dijidiibwa, kwikala ne nsòmbelu mwímpè, mukezùke, wa cijila, mujidila kùdi Diyì dyà Nzambì, ùfila disànka mu mwoyi. Aci cyàkanyùkusha ne kuumusha dilongesha dyà ba-Luthériens búngì cyanààna.

⁷⁸ Pashìishe kulwakù Mpenta ne dibàtiiza dyà Nyumà Mwímpè, ne dyàkacìbùmbakaja cyàkàbìdi, pa kupeta kwà Nyumà Mwímpè. Ncyà bushùwà.

Nenku mpindyewu aci kubangaci kunyùkusha. Nènku mapà, ne dyalujulula, ne Nyumà wa Nzambì mmubwelè, mu kaabujimà kàà bimanyinu ne maalù à kukèma, mu Èkèleeziyà, ne munyùkùshe Mpenta. Ncinyì aci? Tukàadi pabwìpì menemene ne Dilwa dyà Mukalenge Yesù, mu mùshindù wà ne Nyumà mene uvwa munda Mwèndè awu ùdi ùkwàta mudimu mu Èkèleeziyà, wènzà bintu ànu bìmwebìmwè byàkenzàYe pàvwàYe pànu pa buloba. Aci kacyàkenzekakù kaaba nànsha kàmwè to, kubangila ànu ku cikondo cyà bàpostòlò kwàka too ne dìbà edi.

Bwa cinyì? Nwamònu's ncyalàbàle; cyènda cìbùmbakana, cìbùmbakana, cìbùmbakana. Ncinyì aci? Mbyenzè ànu mùdi cyanza cyèbè ciikàle cyènda cìlwa ku mudìdìmbì; ciibùlòjì, ciibùlòjì, ciibùlòjì. Kàdi ncinyì aci? Ndileeejiibwa dyà mu cimfwànyì. Luther ùvwa cinyì? Dileeejiibwa dyà mu cimfwànyì dyà Kilistò. Wesley ùvwa cinyì? Dileeejiibwa dyà mu cimfwànyì dyà Kilistò.

⁷⁹ Mònaayi, cikondo cyà Billy Sunday cìvwa cìfuma ku dijika. Ditùkù adi, mukulumpe Docteur Whitney, mmulongeshè ku cyambilu eku mene, wa ndekeelu wa cìlongelu cyà ndekeelu awu, mmufwè, ne bidimu bitwè ku makumi citèemà, ngeela meeji. Billy Sunday ùvwa mwenji wa matàbuluja bwà èkèleeziyà yà ku dìnà mu matùkù èndè. Yèyè kàvwa ùdyànganakù mukana to; wimana mwaba awu wèla lubilà ne: "Nwènu ba-Méthodistes bwònsò lwàyi mu kajila kàà musenga wa mabaya, bayiishi ne bònsò! Nwènu ba-Baptistes bwònsò lwàyi mu kajila kàà musenga wa mabaya! Nwènu ba-Presbytériens!" Kàvwa ùdyànganakù mukana to. Yèyè ùvwa Billy Graham wa mu ditùkù edi.

⁸⁰ Mònaayi. Ne dìbà adi, musangu wùmweùmwe wùvwa beena èkèleeziyà wa ku dìnà bènza ditàbuluja dyàbò awu,

cyàkenzekà ncinyi? Èvànjeeliyò mu Kaabujimà ùvwa wènza ditàbuluja. Kupàtukakù bânà ba muntu ba-Bosworth, Smith Wigglesworth, ne Docteur Price, Aimee McPherson, bwònsò abu.

Tàngilàayi, Smith Wigglesworth wàkafwà bufùku kampànda. Bucyà mu dindà Docteur Price kufwàye. Pàmbi mèbà makumi àbidi ne anaayi kukùmbana mémè mmata pàanyi mu cyalu.

⁸¹ Mpindyewu wanyi ndekeelu wàlembèledi. Tàngilàayi ku . . . Kanwèna nutàmba kuumvwa bàakula bwà Billy Graham to. Kanwèna nutàmba kuumvwa bàakula bwà Oral Roberts to. Mémè ndi mmòna àanyi masangisha ènda àbwicidila. Mbwalu kaayi abu? Tukàadi ku ndekeelu, cikondo cikwàbò.

⁸² Billy Sunday wàkabwela mu cyalu bishi, ne bakwàbò abu? Bàkabwela mu cyalu ànu dyàkàmwè paanyimà pàà ditàbuluja dinène dyà Moody. Moody wàkabwela mu cyalu dībā kaayi? Ànu dyàkàmwè paanyimà pàà ditàbuluja dyà Knox. Knox wàkabwela mu cyalu dībā kaayi? Ànu dyàkàmwè paanyimà pàà ditàbuluja dyà Finney. Finney paanyimà pàà Calvin, Calvin paanyimà pàà . . . Nànku, Wesley, ne Wesley paanyimà pàà Luther. Ànu nànkù mu bikondo byònsò ki mudibi bìlwa. Pàdi ànu ditàbuluja dijika, Nzambì ùdi ùjuula dikwàbò ne wèla Bukènkè butàmbidile; ùtùngunuka ànu ne kwenda kuya mùshindù awu.

⁸³ Mpindyewu, tukàadi ku ndekeelu wa cikondo eci. Muntu yònsò uvwa ànu mwindile ndekeelu wa ntwangeenu wendè yèyè bwà Dilwa dyà Kilistò, kàdi bàvwa ne byàbùngì byà kwindila; dyalukila dyà beena Yudà, tuumàlòngò tūdi tūbūuka mu maulu, bintu byònsò bitūdi tumòna leelū awu ebi. Kàdi tukàadi ku ndekeelu. Tukàadi kaaba aka mpindyewu. Bàvwa bamanyè ne bìvwa bìkèngela bwà Èkèleeziyà àpetè Bukolè bývwa mwà kwenza mu Èkèleeziyà byenzedi bimwèbimwè byà Kilistò abi, bwalu pàdi mundidimbi wùtamba kulwa mutwile, ne wùtamba kuleeja.

⁸⁴ Angàtà dilèjì. Pàdi mucì kule menemene ne dilèjì adi, udi umòna dilleeja dyà dilèjì ditàmbe bukesè. Paanyimà pàà mutanci, dilèjì adi didi ditàmbe kulwa pabwìpi, too ne mùdi mucì ne dilèjì adi bilwa cintu cìmwè.

⁸⁵ Mpindyewu, Nyumà wa Nzambì mmukwàte mudimu mu dibingishiibwa, mu Luther; dijidiibwa, mu Wesley; dibàtiiza dyà Nyumà Mwimpè, mu Mpenta; kàdi s'ki Yèyè ewu mu ditùkù dyà ndekeelu, munkaci mwà kwenza bintu ànu byòbì bimwèbimwè byàkenzàYe pàvwàYe munda mwà Kilistò apu. Ncinyi aci? Èkèleeziyà ne Kilistò bàalu Umwe.

Ne pàdiBo ànu ne bàtwànganyi, dinungu dyà ndekeelu adi, Yèyè neàye ùpicila mu maulu, wènda wèla mbilà. Wesley, Luther ne bakwàbò bwònsò bàà mu matùkù awu abu, nebàjuuke, “ewu

udi wa kumpàla neikalè wa ndekeelu, ewu udi wa ndekeelu neikalè wa kumpàla,” ne nekùlwè dibìikà dyà ku lufu.

⁸⁶ Tukàadi ku cikondo cyà nshìikidilu. Tèelejàayi, cyôci aci ki cidì Nyumà Mwímpè wenza. Nyumà Mwímpè, ku dibingishiibwa, nwamònu’s, ànu kaamundidìmbì kapeepèle cyanaàna Këndè; Nyumà Mwímpè, ku dijidiibwa, mundidìmbì Wendè bu mutwilekù ndambù; Nyumà Mwímpè, ku dibàtiiza Dyèndè, mundidìmbì mutàmbe kutwila; mpindyewu Nyumà Mwímpè, ku dyalujulula dyà Mupersonà Wendè mene mwikàle kaaba aka, wenza bimanyinu ne maalu a kukèma mwàkenzàYe ku cibangidilu amu. Yoyòyò! Butùmbi’s wè! Nenùmbiikile mùndì “munsantu mubùnguluki wa mu malaba,” nwènù biine, mbipìciibwe ne nwènù babangè mpindyewu.

⁸⁷ Tèelejàayi, bânà bèètù, tèelejàayi eci.

...mèèsà ônsò mmûle tètè ne bilùshì...kakwèna mwaba mukezùke nànsha wùmuvè to.

Nganyì wìkalayè muwà kulongesha dimanya?... nganyì wáfikishayè ku dimanya, dyumvwa dilongesha? ng’aba bàdìbo balekèèshe mabèèle, bàdìbo buumùshe ku dibèèle.

Kí mbânà bakesè bàà mu mabòkò to; bânà bàà mu mabòkò bàà ba-Presbytériens, bânà bàà mu mabòkò bàà ba-Méthodistes, bânà bàà mu mabòkò bàà beena Mpenta, bânà bàà mu mabòkò bàà ba-Luthériens, bânà bàà mu mabòkò bàà ba-Nazaréens. Yèyè ùdi ùkèba muntu udi muswè kuumuka ku mabèèle ne kudya cyakudya cicolè. Kì cyôci cilwalwà eci:

Bwalu kanungu kàdi ne cyà kwikala pa kanungu, . . . pa kanungu; mulongo pa mulongo, . . .pa mulongo; kakesè apa, ne kakesè pàapa:

Bwalu ku mishiku yidi yikukuminà ne mu myakulu mikwàbò mmùngààkulà mèmè ne bantu aba.

Bàakambilaye ne: Diikisha ndyôdi edi munùdi muwà kufikishisha ewu udi muzengèle bwà kwikishayè; ne cyashima ncyôci eci: kàdi bôbò kabààkaswà kutèèleja to.

⁸⁸ Nyumà Mwímpè, byôbi ne kí mmùshindù awu wàkalwàYe mu Ditùkù dyà Mpenta, byamba mu cipròfetà bidimu nkàmà mwandamutekète ne dikumi ne bibìdi kumpàlà kwà kulwaYe! S’ki Yèyè ewu mu Ditùkù dyà Mpenta, mulwè ànu mu byôbi menemene.

⁸⁹ Muntu kampànda ùvwa wàmba ne: “Nkuneemekela kwà ditùkù dyà nsabatu.” Mèmè ncyèna mbènga anyi mpeepeja èkèleeziyà anyi ntèdeleelu wa muntu kampànda to. Kàdi kwabayè ne: “Ditùkù dyà nsabatu, nsabatu wa Nzambi ngubwa ditùkù dyà diikisha adi.”

Kì ditùkù dyà diikisha edi. “Diikisha ndyôdi edi,” mwàkambàYe, “bwà nwènù kufikishisha udi muzengèle bwà

kwikishayè.” Ki dyôdi edi. Amen! “Neciikalè kanungu pa kanungu, mulongo pa mulongo.” Diikisha ndyôdi edi. Nyumà Mwîmpè ncinyi? Diikishsa. Kaa!

Lwâyi kûndi, nwênù bwónsò bàdi bàkwàta mudimu mukolè ne bambùle majitu, ne mèmè nênnùpèeshè diikisha.

⁹⁰ Yèyè ùdi cinyi? Ewu udi ubwela munda mwèbè, ùkupèèsha ditalala awu; cimanyinu cyèbè, Musàmbi webè; wèwè udi musàmbiibwe, mu diikisha, mutwà citampi.

⁹¹ Mmuniyè mùdi. . . ? Ncimanyinu; bàà pa buloba mbamanye ne cintu kampànda ncikwenzèkèle. Yèyè ùdi cinyi? M’Musàmbi. Yèyè ùdi cinyi? Citampi. Wèwè udi mu diikisha. Wèwè udi ne. . . Yèyè m’Mmukulumbulwidi. Byôbi ne, wèwè, cintu kampànda cyôci cikwenzèkèle, kùdi Cintu kampànda mwaba awu bwà kukulumbulwila ne lùkàsà lwónsò, wamònu’s, munkaci mwà dikwakwila. N’Nyumà wa Nzambi udi usòmbela mu Ekèleeziyà, wâkambiibwa mu cipròfetà ànu menemene bwà cìvwàYe mwà kwikala pàvwàYe mwà kulwa. Yèyè ùvwà mwà kwikala diikisha dyà kashidi, dyà Cyendèlèlè.

⁹² Nzambi wàkafùka buloba. Ebèlù, nshapità mwi4. “Nzambi wàkafùka buloba, ne wàkiikisha mu ditùkù dyà mwandamutekète.” Ncyà bushùwà.

Ditùkù dyà mwandamukùlù òvwà dilwa cyàkàbidi, mu. . . Yèyè wàkapèèsha beena Yudà aci bu cipungidi, bwà ntàntà wa cikondo bule kampànda. Ncyà bushùwà. Kàdi bóbò bàdi bàya ne biikisha ditùkù dimwèpelè; bàalukila, ditùkù dyà kumpàlà dyà lumingu, bàbangulula cyàkàbidi, dipyadipyà, bàbangulula. Aci kî ndiikisha òvwà Nzambi mwambe adi to.

Pàakafùkà Nzambi buloba munda mwà matùkù àsambòmbò, pàakiikishàYe, Yèyè wàkiikisha kubangila ànu apu. Ncyà bushùwà. Aci cyàkakòsa bwalu. Yèyè kàakaalukila kàbidi mu ditùkù dyà mwandamukùlù bwà kubangulula nànsha.

⁹³ Cìvwà ànu mundidimbì cyanààna. Mpindyewu, aci cìvwà ncifwànyikijilu, bu mùdi ngondo kùdi dìbà; kàdi pàdi dìbà dijuuka, katùcyèna kàbidi dijinga ne ngondo to. Mpindyewu mònaayaaku eci, kaa, mu Bwàkabuulwibwà 11: “Mukàji mwikàle ne ngondo mwinshì mwà makàsà èndè, ne dìbà kumutù kwèndè aku.” Kaa, s’tudi bafwànyine kutwà eku ne eku kwà Bible, ku cizubu too ne ku cizubu cikwàbò, kàdi kunùleeja. Nwamònu anyi?

⁹⁴ Kàdi ncinyi aci? Kàdi pààbi, Bible mmwàmbe mu Ebèlù nshapità mwi4 ne: “Byôbi ne Yesù mmubàpèèshe ditùkù dyà diikisha, Kàvwà mwà kwikala mwakule pashiishe bwà dyôdi adi to; Úvwà mwà kwikala mwakule bwà ditùkù kampànda dyà diikisha.” Divwa nditùkù kaayi dyàkambàYe adi, bwà diikisha?

Lwáyi kúndì, nwênù bônso bàdì bàkwàta mudimu mukolè ne bambùle majitu, ne mémè nènnpèshè diikisha.

⁹⁵ Maatàayi nshapità wa 11, mvensà wa 22...Tàngilàayi, pashiishe, tudi tupeta cyôci aci patùdi tulwa kùdìYe. “Bwalu yéyè,” mùdi Ebèlù 4 mwámbe, “udi mubwele mu diikisha dyà Yesù adi awu, mmulekele midimu yèndè yà pa buloba, mmwàkalekelà Nzambì Yèndè,” pàakafùkàYe buloba apu, bwà kàyi mwà kwalukilakù kàbìdi to. Too ne díbà kaayi? Udi mutwibwe citampì kùdì Nyumà Mwìmpè too ne ku díbà kaayi? “Too ne ku ditùkù dyà bupikudi bwènu.” Ki diikisha ndyôdi adi, busàmbi, Mutwakwidi, citampì, Musùngidi. Kaa! Ndi ndwa bu musalùke, anyi ndi ndwa bu mubènèshìbwe. Kaa!

⁹⁶ “M’Mutùlaya anyi, Mwanèètù Branham? Mbijaadikiibwe kùdì Bible anyi?”

Èyo, tuyaayi mu Yowèlà, bwà tùjandulè cìdì Yowèlà mwámbe bwà Cyôci aci.

Mùshindù mwine wùndì ne kusàkidila bwà Díyi dyà Nzambi dibènèshìbwe’s wè! Nudi baDìnangè anyi? Ndi ngeela meeji ne bu kabùyì bwà Díyi to, ncyèna mumanye ne mpenyi patùvwà mwà kwikala biimanyiine to. Èyo.

Tudi mu Yowèlà mpindyewu. Tuyààya mu Yowèlà, nshapità mwi2 wa Yowèlà, nènku netùbangilè ku mvensà wa 28. Yowèlà 2.28, bidimu nkàmà mwandamukùlù kumpàla kwà dilwa dyà Kilistò, mupròfètà mu Nyumà. Mpindyewu tèelejàayi.

Ne pashiishe nebyènzekè ne, mémè nêngùcikijè nyumà wanyì pa mubidi wónso; . . .bànà bèènu balela bàà balùme ne bàà bakàji nebàmbè bipròfètà, bakùlakàji bèènu nebàlootè bilòotà, ne nsongàalùmè yènu neyimònè bikèènà-kumòna:

Kàbìdi pa basadidi bàanyi balùme ne pa basadidi bàanyi bakàji nêngùcikijè mu matùkù aa . . . nêngùcikijè, mu matùkù awu, nyumà wanyì.

Ne nèndeejè maalu à kukèma mu maulu kuulu ne pa buloba, mashi, . . .kapyà, ne makunji à mishì.

Dìbà nedyàndamukè mìdimà, ne ngondo neàndamukè mashi, kumpàlà kwà ditùkù. . .dinène ne didì dikwàcishà bwòwà dyà MUKALENGÈ kulwadì.

Ne nebyènzekè ne, ewu yónso wasòka dìnà dyà MUKALENGÈ neàsungidiibwè:

⁹⁷ Aci’s ki . . .Kaa! Cinyi? Yowèlà! Nuvwa bamòne anyi? Mu Byenzedi 2, Peetèlò wàkangata mvensà umwèumwè awu. Yéyè ne: “Nwènu beena Izàlèèlà, tèelejàayi mèyi àanyi. Bantu aba kì mbakwàcike maalà to,” bantu bàdì batwibwe citampì, basàmbiibwe, bàà pabwàbò, batwà cimwènenu aba. “Kì mbakwàcike maalà to, munùdi nucinka amu,” Byenzedi 2,

“bu mùdìbì ne edi ndìbà dyà citèèmà dyà ditùkù. Kàdi eci ncyàkambàbo kùdì Yowèlà mupròfetà, wàmba ne: ‘Nebyènzekè mu matùkù à ndekeelu ne Mémè nêngìcìkijè Nyumà Wanyì pa mubidi wònsò.’”

⁹⁸ Ncinyì Aci, Nyumà Mwîmpè ncinyì? Èyo, mpindyewu tùmònaàyiibi cyàkàbìdì, mulaya beena kwitabuuja, ki cìdìYe ncyòcì. Mpindyewu, Nyumà Mwîmpè ewu, tudì tujandula cìdìYe, ànu katanci aka. M’Mulaya banganyi? Beena kwitabuuja.

Mpindyewu tuyaayi mu Luukà, nshapità wa 24 wa Luukà, tèlèjàayi cìdì Yesù mwambe mu Méyi Èndè à ndekeelu kumpàlà kwà kuumukaYè pa buloba. Luukà nshapità wa 24. Ne nwènu bàdì bàfùnda eci mpindyewu abu, nudi mwà kucifùnda, pashìshe kucìlonga màalabà panwàpetà dìbà dyaùbùngì. Mpindyewu, Luukà 24.49, tèlèjàayi mùdì Yesù wàkula. Ku ndekeelu, pàkaavwàYe ùbànda mu Butùmbi, dibànda, Méyi àkambilàYe bayiidi Bèndè ngòwò aa.

. . . mònaayi, ndi ntùma mulayi wà Taatù wanyì. . .

Mulayi kaayi? Cìtampì, cimanyinu, Musàmbi, ne bintu byònsò bìngàmbì ebi, misangu binunu.

. . . ndi ntùma mulayi wà Taatù wanyì pambidi pèènu: . . .

Mulayi kaayi? “Wàkamba Yeshàayi ne newùlwe awu ne: ‘Ne mishìkù yìdì yìzakalalà ne mu myakulu mikwàbò mmùNgààkulà ne cisàmbà eci.’ Nèntumè diikisha adi pambidi pèènu. Nèntumè cyàkambàbo kùdì Yowèlà, ne: ‘Nebyènzekè mu matùkù à ndekeelu ne, mùdì Nzambì wambà, Nêngìcìkijè Nyumà Wanyì pambidi pèènu.’ Kaa, Nènnùtùmìnè, ne mvwija matùngà ònsò, bantu bònsò, kubangila ku Yelusàlèrà. . . Nèmfikishè dimiinu dyà Abraham mwìnshì mwà cipungidi eci. Nèntwe yònsò wa kùdìbo cìtampì. Nwamònu’s, Nêngìcìkijè Nyumà Wanyì.”

. . . mémè nèntumè mulayi wà Taatù wanyì pambidi pèènu: kàdi nujìngakanè, mbwena kwamba ne, nwìndilè mu cimenga cyà Yelusàlèrà, too ne panwikalà bavwàdìkìibwe ne bukolè bwà ku dyulu.

⁹⁹ Nyumà Mwîmpè ncinyì dìbà adi? “Bukolè bwà ku Dyulu!” Kì mbukolè bwà kùdì mwepiskòpò to, kì mbukolè bwà kùdì èkèleeziyà to. Kàdi: “Bukolè bwà ku Dyulu!”

¹⁰⁰ Bukolè abu bwàkalwa munyì? Ku “diya kashààla wa mu èkèleeziyà” anyi? Mémè ndi nkwela kadyòmbò bwà kwenza nànkù, wèwè mudidinge mwambe ne aci ncyà bushùwà. Ku “diya kashààla wa mu èkèleeziyà, ku dilabula dyà muyiishi ku cyanza” anyi? To, mukalenge. Mpindyewu, kùdì nwènu beena Kàtòlikè, “kupàtula ludìmi kwangata nkòmuniyò wa kumpàlà” anyi? To, mukalenge.

¹⁰¹ Bwàkalwa munyì, Bukolè bwà ku Dyulu abu? Twànji kubalaayi ndambù too ne kwìnshì. Tuyaayi mu Byenzedi

1.8. Bàdi munkaci mwà kудisangisha pàmwè mpindyewu. Mpindyewu bàvwa munkaci mwà kwakula bwà Yesù kaaba aka, pàvwàbo badisangishe pàmwè apu, ne bàkaavwa bajidile kampànda mukwàbò bwà kwangatayè kaaba kàà Yudaàsè. Byenzedi 1.8.

Kàdi nenùpetè bukolè, paanyimà pàà eci Nyumà Mwìmpè ewu mumane kulwa pambidi pèènu, . . .

Cinyi? “Udi ulwa cidimba cyà Branham Tabernacle” anyi? To. “Udi ulwa cidimba cyà èkèleeziyà wa ba-Méthodistes, cyà èkèleeziyà wa Kàtòlikè, wa ba-Presbytériens” anyi? Kí nnàнку nànsha, bwà mu Bible. Adi’s ndilongesha dikwàtakaja kùdi bantu.

“Kàdi neùpetè Bukolè paanyimà pàà wèwè mumane kulwa muiishi” anyi? To, mukalenge. “Neùpetè Bukolè paanyimà pàà wèwè mumane kupeta dipòlomè dyèbè dyà Licencié” anyi? To, mukalenge. “Neùpet-. . . nekùlwe Bukolè paanyimà pàà wèwè mumane kupeta dipòlomè dyèbè dyà DD” anyi? To, mukalenge. “Neùpetè Bukolè paanyimà pàà wèwè mumane kubàtiijiibwa mu màyi” anyi? To, mukalenge. “Neùpetè Bukolè paanyimà pàà wèwè mumane kwangata nkòmuniyò wa kumpàla” anyi? To, mukalenge. Nwamònu’s, byònsò abi mbintu bikwàtakaja kùdi bantu.

¹⁰² Tèèlejàayi cidi Bible mwambe, cidi Yesù mwambe.

. . . nenùpetè bukolè, paanyimà pàà Nyumà Mwìmpè mumane kulwa pambidi pènu: (Nyumà Mwìmpè ncinyi? Bukolè) pashiishè, paanyimà pàà cyòci eci, nwènu nenuikalè bantèmù. . . (“Ànu nwènu dikumi ne bàbidi abu, ki bààfilà bujaadiki mu Yelusàlèmà” anyi?) . . . nwènu nenuikalè bantèmù bàanyi mèmè ne mu Yelusàlèmà, . . . Yudaàya, . . . Sàmaalèya, too ne ku bitùpà byà kule menemene byà buloba. (Kùdibo kacya kabàyi banji kufika aku.)

Nèнку pàakamanàye kwamba bintu ebi, . . . pàakamanàye kwamba bintu ebi, pàcivwàbo bamutàngile yèyè apu, wàkambwibwa muulu mu ditutu ne wàkuumushuubwa . . . ku mèsù kwàbò.

¹⁰³ Mpindyewu buulùlaayi luseke lukwàbò lwà dibeji alu, tàngilàayi mùdi biprófetà ebi byùla.

Nèнку pàakalwà ditùkù dyà Mpenta, bàvwa bàsanganyiibwa mu kaaba kàmwè. . . bàvwa bònsò ne dýi dimwè mu kaaba kàmwè.

“Nèнку dyàkàmwè mpaasàtà kubwelayè ne. . .”? Ndi mupàtùke mu mulongo awu mwaba awu, kí mmwòmò anyi? “Dyàkàmwè nsaserdòsè kulwayè ku cyàltàr” anyi? To.

Ki dyàkàmwè kulwàkù cyonà . . .

Kaciyi ànu cyà budìngìbudìngì to; Cìvwa mwaba awu, cyonà.

“Muyiishi kampànda ùvwa wènda ùsemena ku ciibi” anyi? “Nsaserdòsè ùvwa ne nkòmunyò, ùpàtuka mu mwaba munsantu” anyi? To, kî ncintu nànsha cìmwè cyà mùshindù awu to.

...kulwakù cyonà cìfùmina mu dyulu... (Kaciyi difiita dyà makàsà panshì to)... kulwakù cyonà cìfùmina mu dyulu bu mùdì... cipeepèlè cìkolè cyà civuma (Kaa, ekelekele! Yoyòyò!...?...)... ne cyàkuuja nzùbu mujimà mùvwàbo basòmbèle amu.

¹⁰⁴ Nyumà Mwímpè ncinyi? Ki pòpò apa pààdìbo bàpetela Bukolè abu. Ki pòpò apa pàdìbo ne cyà kwindila; ki cyàkenzekà aci pààkenzàbo bòbò nànkù. Cyònsò cimana kwamba mu cipròfètà, kubangila ànu ku Genèsè too ne apa, kubangila ku Abraham too ne kundekeelu; Yèyè ùvwa mwà kulwa, ne mùshindù wùvwàYe mwà kulwa, ne mùvwà bipeta mwà kulwa's. Yèyè ùdi cinyi? M'Mulaya Èkèleeziyà, beena kwitabuuja.

...ne cyàkuuja nzùbu mujimà mùvwàbo basòmbèle amu.

Ne kwàkabàmwènekela ndìmì mipandùlùke bu... yà kapyà, ne yàkasòmba pamutù pàà yònsò wa kùdìbo.

Ne bònsò bààkuujiibwa tètè ne Nyumà Mwímpè, ne bààkabanga kwakula mu myakulu mikwàbò, bilondèshìle mùvwà Nyumà mubàpèeshe mwà kwakula amu.

Mpindyewu netùfikè ku cyòci aci, mu diitànù dilòòlò. Netùshiyè aci ànu mwaba awu mene, nwamònu's.

¹⁰⁵ Yèyè ùdi bishi? Mmulayi mwenzela Èkèleeziyà, mulayi wa kawùyi dyela mpatà to. Eyo.

¹⁰⁶ Mpindyewu, mpindyewu netùjandulè ne, paanyimà pàà bamanè kuujiibwa tètè, bààkatwibwa citampi too ne dîbà kaayi? [Disangisha didi dyamba ne: “Too ne ku ditùkù dyà bupikudi.”—Muf.]

Mbanganyi kaaba aka bàdi ne Nyumà Mwímpè? Tùmònaayibi byanza byènu. Bàdi ne Nyumà Mwímpè mbàdi bààbùngi kupita bàdi kabayi Nendè. Tudi baswè wikalè umwe wa kutùdi, wèwè mwanèètù wa balùme, wèwè mwanèètù wa bakàjì. Paùdi umvwa cidìYe, Yèyè ùdi... N'Nyumà wa Nzambi musòmbèle munda mwèbè, bwà kwenza byenzi byà Nzambi.

Pàvwàku Nzambi ùtùma Nyumà Wendè mu yònsò wa ku basadidi Bèndè, yònsò wa ku bapròfètà Bèndè, yònsò wa ku balongeshi Bèndè, yònsò wa ku bapostòlò Bèndè, bàvwa misangu yònsò ànu bàbèngiibwa kùdi bàà pa buloba. Bàvwa bàbàngata bu bapàle, mu cikondo cyònsò cìvwàku aci. Nànsha pààkiimanà Pòlò kumpàlà kwà Agrìpà, wàkamba ne: “Mu njila udibò bàbìikila ne ndipàmbuka...” *Dipàmbuka* ncinyi? “Mupàle.” “Mu njila udibò bàbìikila ne mmupàle, musumbà wà bapàle,

mùshindù awu ki wùndì nkuukwila Nzambì wa baataatù bèètù.” Mémè ndi nsànka be mùndì mwà kwamba ne ndi umwe wa kùdìbo. Èyowà’s, mukalenge. Ncyà bushùwà. Ndi nsànka be mùndì mwà kwamba ne ndi umwe wa kùdìbo.

¹⁰⁷ Mpindyewu, paanyimà pàà Nyumà Mwímpè ewu mumane kubàpwekela, Wàkabàvwija banàngàngàne mu mùshindù wà ne bintu byònsò byàkatèèkiibwa kaaba kàmwè. Ncyà bushùwà anyì? Ekèlekèle, ekèlekèle, bwobùmwe kaayipu’s wè! Tutu misangu mikwàbò twimba musambu awu ne: “Kaa, bwobùmwe kaayipu’s wè! Kaa, disànka kaayipu dyà kùdi Nzambì’s wè!” Ki cyòci aci. Kabàvwakù bàcyùka, kabàvwakù bàcyùka ní—ní díbà dívwa diteemè anyì kadívwa diteemè to. Bòbò kabàvwakù bàlòmba bulààlù bwà maalu mapeepèle bulengeja ne bilòngò to.

“Mpindyewu, mémè nêngààkidilè Nyumà Mwímpè,” mùtù bàmwè bantu bàngambila, “Mukalenge Branham, bu wèwè mwà kunjaadikilakù ne nêngìkalè mwena miliyò ne miliyò ya ndola, bu wèwè mwà kunjaadikilakù ne nèmpetè biinà byà mpiitùloolù, ne bu mémè mwà kupetakù biinà byà ngòlò, ne mémè—mémè...” Nwamònu’s, bantu bàtu bòbò bàlongeshangana nàнку awu, kàdi’s bàdi bàlongeshangana mashimi. Nzambì kàtu mulayàngàne bintu abi to.

¹⁰⁸ Muntu udikù ùpeta Nyumà Mwímpè kèna ùcyùka nànsha yèyè ùlòmbangana dyàmpà dyà kàà pa luse, anyì kàyì ùlòmbangana to. Kèna ùmòna dishiilangana to bwèndè yèyè. Yèyè ùdi cifùkiibwà cidi mu njila citàngile mu Dyulu. Kèna... Yèyè kènàku ne cidi cimuswike pànwàpa to, nànsha cimwè. Ncyà bushùwà. Kèna ùbicyùka to. Bibandè, bipwekè, cyàswà kwenzeka aci cyènzekè. Bantu bàmujaanè, bàmwelùlwilè. Nànsha wèwè mujimije kaneemu kàtùbu naaku kùdi, bwalu bùdi penyi? Wèwè’s udi mu njila mutàngile ku Butùmbi! Àlèluuyàh! Èbè mèsù mmatàngija kùdi Kilistò, ne wèwè udi mu njila wenda uya. Kwèna ucyùka bìdi bàà pa buloba bàmba to.

Ki cidi Nyumà Mwímpè ncyòci aci. Yèyè ùdi Bukolè, Yèyè ùdi citampi, Yèyè ùdi Musàmbi, Yèyè ùdi Mutùlumbulwidi, Yèyè ùdi cimanyinu. Kaa, ekèlekèle! Yèyè ùdi ditwishiibwa dyà ne Nzambì wàkwakididi.

Ngàngàci mukùngùlù bule kaayi? Nkunshàadile ànu tusunsa mwandamukùlù. Èyo. Ngánjibi...Ndi ne Mifùndu búngì cyanàànà kaaba aka. Ncyèna ngeela meeji ne ndikù mwà kuyèlamù to, kàdi ne—netwénzè ne mwètù mwònsò.

¹⁰⁹ Mpindyewu, paanyimà pàà muntu mumane kuujiibwa tètè ne Nyumà Mwímpè, bidikù mwà kwenzeka ne dikèngeshiibwa ne bikwàbò bìmufikishè ku dyalukila cyànyimà ne... Mpindyewu, yèyè kàakujiminà to, yèyè ùcidi ànu mwànà wa Nzambì, ki ciikalàye misangu yònsò, bwalu wèwè udi mutwibwe citampi too ne díbà kaayi? [Disangisha didi dyàmba ne: “Too ne

ku ditùkù dyà bupikudi.”—Muf.] Ncyà bushùwà. Ki cidi Bible mwambe.

¹¹⁰ Mpindyewu, paanyimà pàà bayiidi bamane kutuuciibwa, bamane kusekiibwa, bamane kubèèlulwila, ne byònsò, bààkeela meeji ne díbà dyákumbanyi dyà kudisangishakù pàmwè ndambù. Tùbuululàayi mu—mu Byenzedi nshapità mwi⁴, bwà tùmone ne pàvwàbo. . . cyàkenzekà ncinyi. Mpindyewu eci cidi bwènù nwènù bàkaadi baMupetè. Byenzedi nshapità mwi⁴.

Mpindyewu, Peetèlò ne Yone bàkààvwa batuuciibwe, beediibwe mu búlokò, bwà dyondopangana, bwà dyenza dyà mudimu wà dyondopangana ku ciibi cyà èkèleeziyà aku. Mbanganyi bàdi bamanyè nànkù? Kùvwa muntu mulàadika kuntwaku, mwenze bu uvwa ne bulèmà bwà makàsà nànkù awu. Kàvwa mwà kwendela kuulu to; ùvwa mùshindù awu bidimu makumi ànaayi. Ki Peetèlò kupicilayè mwaba awu. Ki kwambayè. . . awu kujuulaye dikopo dyèndè, bwà kupetakù kantu kàà bàmwelèla mu dikopo dyèndè adi amu, bwà kupetakù cyàkudyà.

Ki Peetèlò kuleejayè ne yèyè ùvwa muyiishi muujiibwe tètè ne Nyumà Mwimpè, kàvwa ne mfranga nànsha mikesè to. Kwambayè—kwambayè ne: “Ní ng’argent ní nngòlò mèmè ncyèna naabi to.” Nwamònu’s, kàvwa yèyè ùcyùka abi to. Kàdi yèyè ùvwa cifùkiibwà civwà mu—mu njila citàngile ku Dyulu. Kaa, mùshindù mwine wùndi njinga bwà twikalakù ne díbà dyà kudyàdija mu cyòci aci mwaba awu bwà katanci’s wè, nwamònu’s. Yèyè ùvwa mu njila mutàngile ku Dyulu. Ùvwa musàmbiibwe. Yèyè ùvwa ne Nyumà awu. Ùvwa ne Bukolè abu. Kuyayè tàmakàtamàkà e kwambayè ne: “Ní ng’argent ní nngòlò mèmè ncyèna naabi to, kàdi cìndi naaci ki cingàakupèshà.”

Kakùyì mpatà to muntu awu wàkamba ne: “Cyùdi wèwè naaci ncinyi, mukalenge?”

“Mèmè ndi ne diitabuuja. Ndi ne cintu kampànda munda mwà mwoyi wànyi cidi cibangè kùkaadi matùkù bu dikumi nànkù awu. Mvwa nsanganyiibwa mu cibambalu cyà kuulu mwàmwa, ne dyàkàmwè, milayi yònsò yivwà Nzambi mwenze. . . Mvwa mwendè ne Yesù Kilstò munda mwà bidimu bisàtu ne citupà. Mvwa mulòbe Nendè, ntùpula mishipa ndwa naayi. Ndi mwenzènze bintu bishiilèshiiilàngàne ebi. Ne mvwakù muMumòne wòndopa babèedi. Mèmè. . . Ùvwa ànu wènza kungambila ne: ‘Taatu ùdi munda Mwànyi emu; kàdi pàNgùumukà, Yèyè nealwe munda mwènù.’ Pa nànkù, mèmè ncivwa mwà kuumvwa aci to. Kàdi Ùvwa wàmba ne: ‘Mpindyewu, Ncyèna ntékemena ne nwènù nenùbyùmfwè to.’”

Wèwè kwèna umvwa bintu ebi to; byàkìdilè wèwè ànu nànkù. Mèmè ncyèna pàanyi mwanji kubyùmfwà to. Nènku kungambidiku ne wèwè udi ubyùmfwà to; bwalu, kwèna ubyùmfwà to. Nwamònu anyi? Pa nànkù, mèmè ncyèna mwà

kuMuumvwa to, ncyêna mwà kuMuumvwija to; kàdi, cintu cimwèpelè cìndi mumanye ncyà ne, ndi Nendè.

“Èè, èè,” mùdi wamba, “aci kî ncyà ku maalu à mamanya to.” Kaa, s’ncyà bushùwà ne ncyà ku ówò.

¹¹¹ Tangilàayi makênkè aa nàka. Pàvwa Benjamin Franklin mubùkwàte, wàkamba ne: “Ngábùkwàci.” Kàvwa mumanye cìvwaye naaci to, kàdi ùvwa naabù. Nènku ndi muswè bwà dilòòlò edi muntu àngambilè cìdi nzembu. Kî mbanjì kumanya cìdiyi to, kàdi’s tudi naayi. Amen. Ncyà bushùwà. Kakwèna muntu nànsha umwe udi mumanye cìdi nzembu to. Bàdi mwà kuyìkwàta, kuteemesha naayi bukênkè, kuteemesha naayi mudilu, kuyifikisha ku dyenya bwalu. Kàdi yidi—yidi yìfidiibwa kùdi myòteelà, tuntu túbidi tùnyinguluka pàmwè nunku *ewu*. Cìdi cìyìpàtula, ne ki cyònsò cìdìbo bamanyè aci’s. Yidi yìfila bukênkè, ne yidi ne bukolè munda mwàyì.

¹¹² Ne aci cìdi bu Nyumà wa Nzambì. Paùdi upeta kantu kàmwè, kòkò aku ki wèwè, ne kakwàbò kantu ki Nzambì; ne paùdi utùfikisha twòtò atu ku dinyungulukila pàmwè mùshindù *ewu*, nebyènzè cintu kampàndà bwèbè wèwè. Aci ncyà bushùwà. Necifilè Bukênkè. Necifilè Bukolè. Wèwè kwèna mumanyè Cìdici to, ne kwàdyàkumanyakù Cìdici to, kàdi udi mumanye paùdi muCìpetè. Kì cintu cimwèpelè cyà bushùwà ncyòci aci. Ne Cìdi bwèbè wèwè. Ncyèbè wèwè. Cìdi ditwishiiibwa. Ncyà bushùwà.

Bukênkè *bwàbwa* bùdi bùleeja cinyi? Kì ditwishiiibwa ndyòdi adi. Mbukênkè.

Mpindyewu mònaayi eci. Mpindyewu, kwèna mumanye Cìdici to.

¹¹³ Kàdi bantu aba bàakamba ne: “Èè,” bàvwa . . . kwambabò cintu cìvwàbo bamanye, “tudi bamanye ne bòbò mbapangi.” Bakwàbò “bapàle’s,” nudi numòna’s, mwàkambà kalùmýàna kàà beena Allemagne aku ne ki cìvwàku. Nwamònu anyi? Kwambabò ne: “Mbapangi ne kabàyi bamanye mukàndà to. Kàdi bàvwa ne Mulòbi awu, Mupeyi wa mabaya awu kuntwaku, uvwàbò bàbìikila ne n’Yesù awu, ndi nzwambila’s, bwalu’s bàdi bènza bintu bìmwèbìmwè bivwà Yèyè awu wènza abi.”

¹¹⁴ Kì cìdi Nyumà Mwímpè ncyòci aci, n’Yesù musòmbèle munda mwà mulòbi mupangi, mupeyi wa mabaya, anyi ní ncinyi, muyiishi mupangi, cyònsò cìdiku aci. Mmuntu udi muswè kwikala mupangi ku maalu à pa buloba, kàdi ùlekela Yesù ùbwela munda mwèndè, Nyumà wa Nzambì, citampì, Musàmbi. Yèyè kèna ùcyùka byà tuneemu abi to; cintu cimwèpeleè cìdiye yèyè ùkèba cìdi ànu Nzambì.

¹¹⁵ Pàvwà Nzambì ùtèèka mu bulongàme, Wàkamba ne: “Nwènu bònsò beena Lewì, Mèmè ngudi munùbìikile ne munùvwijè baakwidi. Nènku bânà bèènu bònsò, bakwàbò abu, bisàmbà dikumi ne bibìdi ne . . . bisàmbà bikwàbò dikumi ne cimwè abi nebinùfutè cyàdiikumi.”

“Mbwená kwamba ne, paùdì upeta mishikì citèemà yà bimuma byà pommés, udi upòngolwela beena Lewì mushikì wùmwpèlè. Paùdì upicisha mìkòòkò yèbè mu ci—cibweledi emu, umùshàmu mùkòòkò wà dikumi awu. Nànsha wòwò mukèsè, anyì munènè, wà maanyì, anyì wà munyaane, awu ngwà beena Lewì.

“Mpindyewu, nwènu beena Lewì, panùdì nupeta byònsò ebi, díbà adi, wèwè pèèbè, udi upàtulamù cyàdiikumì, ufla kùdì Mukalenge. Udi wenza mulàmbù wà dinyùkula, milàmbù yà dibàndisha, milàmbù mishìilèshìilàngàne. Udi ufla cyàdiikumì kùdì Mukalenge.”

¹¹⁶ Yèyè kwamba ne: “Mòsà, ku lwèbè luseke, Mèmè ndi cyèbè citùpà.” Kaa, ekèlekèlè! KwambaYè ne: “Mèmè ki cyèbè citùpà cikwabanyina cìdì cìsànkishà.”

Nènku ki cìdì Nyumà Mwímpè bwà Èkèleeziyà leelù ewu. Ní ng’argent ní nngòlò ncyèna naabì to, kàdì ndi ne Citùpà cingaabanyina cìdì cìsànkishà. Àlèluuyàh! Dilonga dyà kàlaasà, mèmè ndi mwà kubala mene Mukàndà ewu ànu ne lutàtù, kàdì ndi ne Citùpà cingaabanyina cìdì cìsànkishà. Abi’s mbìmpè. Dìpòlomè dyà docteur, ncyèna naadi to; màpòlomè à Ph.D ne à LD, anyì cintu cikwàbò nànsha cìmwè. Kàdì kùdì cintu cìmwèpèlè cìndì mèmè naaci, Citùpà cingaabanyina cìdì cìsànkishà. Ki citùpà cìndì mèmè muswè ncyòci aci. Ki citùpà cìdì Nzambì muswè bwà wèwè kwikala naaci. Imànshà bintu bikwàbò byònsò byà kale ebi kule, byònsò byà tuneemu ne bikwàbò byònsò abi, nènku ùpatukè ùpetè Citùpà cikwabanyina cyà Nzambì cìdì cìsànkishà aci’s.

¹¹⁷ Bwalu, byùdì mupetè byà pa buloba ebu abi, neùbishiyè pànwàpa paùmukà. Kàdì wèwè ne Citùpà cikwabanyina cìdì cìsànkishà aci, neCikwambùlè ciye nèèbè muulu ànu cyà bushùwà. Tutu misangu yònsò tusùmba assurance wetù, leelù ewu, bwà kupèèsha mujiiki wa bitàlù. Tùpetàayi Citùpà citwàbanyina cyà Nzambì cìdì cìsànkishà, bwà twètù kupeta Mujuudi wa bitàlù pamutù pàà mujiiki wa bitàlù. Nudi bamanyè’s, bwònsò bàbidì abu bàdì ànu bàkwàta mudimu.

¹¹⁸ Mpindyewu tùmònàayi bì.

...pàakabàlekelàbo, bàakaya kùdì beena dyàbò sungasunga,...

Kabààkaalukila kùdì baakwidi nànsha. Nwamònu’s, aci cyàkaleeja ne bàvwa baMupetè. Kabàvwa bàalukila kàbidì ku cintu cyà kale, cikwàte mashika, cyà kwìsùkwìsù aci to, bwàlà; bwà kwalukilakù ne kwamba ne: “Mpindyewu tàngilààyaaku kuneeku numòne mùdìbo batwènzè’s!” To, to. Bòbò bàvwa ne beena dyàbò bàà sungasunga. Bàvwa ànu bu dikumi ne bàbidì mwaba awu, kàdì abu’s bùvwa ànu bùngì bukùmbàne bwà beena dyàbò, dyanza dikesèè dyà bantu.

...pàkabàlekelàbo,...

Paanyimà pàà bamanè kubàtuuta ne kubàkànyina, kubàmbilabo ne: “Nwènu ànu badìdinge babàtiize kàbìdì mu Dìna dyà Yesù!” Anyì, kaa, mvwa njinga kwamba. . . Èè, ncyà bushùwà’s. Nwamònu anyì? “Nwènu ànu badìdinge bayiishe cyàkàbìdì mu Dìna dyà Yesù, cyònsò cinwènzà aci, netùnùpetè!”

¹¹⁹ Bòbò ne: “Kya, aci’s mukànù ànu wà menemene ewu’s. Tùyaayi kùdì bânà bèètù bakwàbò abu.” Kaa, ki mùshindù ngwòwò awu. Búngì mbupite bulòbò. Nkùndè ya bàngì yìbobèle ne matè. Kwambabò ne: “Tùyaayi ànu kùdì bânà bèètù bakwàbò bwà tùmone citùdìku mwà kwenza.”

¹²⁰ Mpindyewu ki kudisangabò bwònsò ne kubangabò kulondelangana malabula mashìilèshìilàngàne.

. . . pàkabàlekelàbo, bàakaya kùdì beena dyàbò sungasunga, ne kubàlondelabò byònsò bìvwà baakwidi banène ne bakulù abu babàmbile.

Ne pàakamanàbo kuumvwa nànkù, bàakabàndisha mèyi àbò kùdì Nzambì ne dýì dimwè, . . .

Mpindyewu tèèlejàayaaku cyàkambàbò. Mutàngilaayi, bàtàngilaayi nùmonè, kabàyi bàalukila bwà kwamba ne: “Èyi. . .” cintu kampànda cyà ne: “Èyi Mukalenge, mfwilèku luse. . .” To. Bòbò bàkaavwa bamanè kusùngidiibwa. Bàvwa buujiibwe tètè ne Nyumà. Bàvwa ne Mwoyi wà Cyendèlèlè.

. . . bàakabàndisha dýì. . . ne dýì dimwè, ne bàakamba ne: Mukalenge, wèwè ngudi Nzambì, . . .

Amen! Mèmè ndi munange ànu aci’s, Mwanèètù Palmer. Ndi munange aci.

. . . wèwè ngudi Nzambì (tudi bamanyè aci) udi mufúke maulu, ne buloba, ne mbù, ne byònsò bìdimu:

Wàkaakwila mukana mwà musadidi webè Davìdì. . . mwambe, . . .

¹²¹ Tàngilàayi mpindyewu, nwènu nenwàlukile, nwamba ne: “Mpindyewu, twètù katwèna. . .” Mpindyewu wèwè udi upàtuka kwàka wamba ne: “Èè, mpindyewu, Mukalenge, mpindyewu anjì indilà kakesè kaaba aka. Bòbò’s nyà bàdì ànu bàngeelulwila bikolè!” Yèyè kàakambakù ne ki cyènzàbo anyì?

“Bwònsò bàdì ne nsòmbelu wa difwàna dyà Nzambì mu Kilistò Yesù nebàkèngeshiibwè.”

“Èè, udi mumanye’s, mfùmwanýì wa mudimu mmungambile ne yèyè ànu mudìdinge mumpetè. . .” Kabàtukù bambè ne mmwàmbàbo anyì? “Èè, udi mumanye’s, s’mbampulumune too ne ku tubàdì ditùkù adi, bwà Cyòci aci.”

¹²² Yèyè kàakambakù ne: “Nebàye neenù kumpàlà kwà bamfùmù ne balombodi, bwà Dìna Dyànyì. Kanùdyèlèdì meeji bwà cinwàmbà to, bwalu kí nnwènu bàdì bàakula to” anyì? Ngàcimònu cyènzeka makèèlèla awu. “N’Nyumà Mwímpè udi

musòmbèle munda mwènù awu; Yèyè ngwákula.” Nwamònu’s, “Yèyè.” Ncyà bushùwà. Èyo. “Kanüdyèlèdi meeji bwà cinwàmbà to.”

Mukalenge, ku...Wèwè wàkaakwila ku...mukana mwà musadidi webè Davidi udi mwambe ne: Bampàngaanù mbafuuna bulòbo bwà cinyi, ne bantu mbadiwànyikijile cintu cyà pàtupù bwà cinyi?

Bamfùmù bàà pa buloba mbajuukile kuulu, ne balombodi...mbadisangè pàmwè bwà kulwisha Mukalenge, ne bwà kulwisha Kilistò wendè.

...cya bulelèlà, Mukalenge, bwà kulwisha mwanèèbè wa cijila Yesù, ùdi wèwè mwele maanyi, bwònsò bàbìdi, Helòòdè ne Ponsiyo Pilaatù, pàmwè ne bàà Bisàmbà byà bendè, ne cisàmbà cyà Izalèlèlà, ...mbadisangè pàmwè,

Bwà kwenza cyònsò cidi cyanza cyèbè ne mubelu wèbè bidyànjlile kupàngadika kumpàlà bwà kwenjüibwabi.

Kaa, ekèlekèle! Mémè ntu muswè aci. “Mukalenge, bàdi bènza ànu menemene cintu ciine cyùdi Wèwè mwambe ne nebènze aci.” Bible mmwambe cinyi? “Mu matùkù à ndekeelu, nekùlwe baseki; beena mitù mikolè, badibàndishi, banangi bàà masànka kutàmba kwikala banangi bàà Nzambi; kabàyi bàkùmbaja mèyi àdìbo bàmba, bashiminyinyanganyi bàà maalù, kabàyi ne kudikànda, badyombodi bàà aba bàdi bìmpè; biikàle ne cimwènekèlu cyà difwànà dyà Nzambi, kàdi biikàle bàvila...” Kacya bòbò kabàtukù bayè kuulu kwàka bakapetè Bukolè to: “...paanyimà pàà Nyumà Mwîmpè mumanè kulwa pambidi pèènu.” “Biikàle ne cimwènekèlu cyà difwànà dyà Nzambi, kàdi biikàle bàvila bukolè bwàdi: tàpulukàayi ne bàà nànkù abu.” Ki cidi Nyumà Mwîmpè ncyòci aci. Nwamònu anyi?

...bìdi bipàngadika...bwà kwenjüibwabi.

...mpindyewu, Mukalenge, mònaaku mikànù yàbò, nènku—nènku enzelàku basadidi bèèbè bwà ne, ne dikima dyònsò twètù twamòna mwà kwamba diyi dyèbè,

Kaa, mémè ndi munange aci’s wè! Umùshaayi mufùbà wa kale wa cipumpù awu, tèèkaayi mufùbà mulelèlèlà wà mwongo muntwamu. Mpindyewu tàngilàayi apa.

...twamòna mwà kwamba mèyi èbè,

Pa kwolola kwà cyanza cyèbè bwà kwondopa;...

Kaa, mwanèètù! Démons kayitù yifwa to, kàdi nànsha Nyumà Mwîmpè pèndè kàtu ùfwa to. Nwamònu anyi?

...kwolola kwà cyanza cyèbè bwà kwondopa;...bwà bimanyinu ne maalù à kukèma byènjiibwè mu dìnà dyà mwanèèbè wa cijila Yesù.

S'nudi numòna cìvwàbo bàkòkelangana aci, kí mmwòmò anyi? Bàdi bènza cintu cimwècimwè aci leelù ewu, kàdi kacýèna ne dikwàcisha nànsha dikesè to.

Nènku pààkamanàbo kusambila, mwaba wùvwàbo badisanǵishìle wàkazakala; ne bwònsò bààkuujiibwa tètè ne Nyumà Mwìmpè, ne . . . bààkamba díyì dyà Nzambì ne dikìma.

123 Yoyòyò! Ekèlekèlè! Bààkapeta cintu kampànda pààkabàndàbo kuulu aku, kí mmwòmò anyi? Mulayi mmwambe ne ki cìdì Nyumà Mwìmpè aci, bwà kukupèèsha dikìma, bwà kukupèèsha busàmbi, bwà kukutwà cìtampì, kukupèèsha cimanyinu. Kaa, ekèlekèlè!

124 Tèelejààyi. Kaa, mwaba njinga bwà twìkalakù ànu ne díbà, tuvwakù mwà kupweka ne Filipò kùdì beena Sàmaalèyà. Mu Byenzedi 8.14; nwènù bwònsò bàdi bàcifùnda abu. Bàvwa bapetè disànka dinène, bàvwa bapetè dyondopa dyà mäsamà makolè, kàdi bàvwa babàtìjìibwe mu Dìna dyà Yesù Kilistò. Kàdi kutùmabò mukenji ku Yelusalèmà, bwà kangatabò Peetèlò; yèyè kulwa ne kubàtentekelayè byanza, ne kupetabò Nyumà Mwìmpè. Byenzedi 8.14.

125 Bàà Bisàmbà byà bendè, kùvwa muntu dìnà dyèndè Kòneeliyò. Úvwa muntu mulenga wa dikèma, ùfuta byàdiikùmi, mwashilàashìle bantu mansunàngòngà, ùneemeka Nzambì, ùcìina Nzambì; muntu mwìmpè, Presbytèrien mwìmpè, Méthodiste, Baptiste, anyi cìntu kampànda cìkwabo, nwamònu's, muntu mwìmpè wa dikèma. Kàdi dìngà ditùkù, Nzambì kwambaYè ne: "Yèyè mmuntu mwìmpè; pa nàнку Nèmmutùmè ànu ku disanǵisha kampànda. Nebikèngelè bwà mfikisha muyiishi wanyì kaaba aka bwà kumwambilaCì." Èyo.

Ki kumònayè cìkèèna-kumòna, cyàmba ne: "Pweka ku Yopà, neùsanganè kuntwaku muntu dìnà dyèndè Simonà, mukoonyi wa bisèba. Ne kùdì muntu kuntwaku, Simonà Peetèlò, munda amu. Àlwe mwaba ewu; yèyè neàkuleejè njila, bwalu mmupetè cintu kampànda."

126 Kàdi pàcìvwà ànu Peetèlò mwimane mwaba awu . . . Nènku Kòneeliyò ùkaavwa ùkuukwila muyiishi awu. Èyowà . . . Kàdi Peetèlò kwambayè ne: "Juukà. Mèmè ndi muntu ànu mùdì wèwè amu."

"Nènku pàcìvwà ànu Peetèlò wàmba Mèyì aa," àà mùvwàbo bayè, ku cibangidilu ku . . . Bintu bìmwebìmwè bìndì ngamba ebi, mùvwà Nzambì mulaye bwà kwicikija Nyumà Mwìmpè. "Pàcìvwàye ànu wàmba Mèyì aa, Nyumà Mwìmpè kubàpwekelaYè." Yoyòyò! Èyowà. Ki cìdì Nyumà Mwìmpè ncýòcì aci, ki bwà nganyì bùdìYe. Bushùwà's. "Ne bwònsò bààkuujiibwa tètè ne Nyumà Mwìmpè."

127 Mpindyewu mònaayi mu Efèsò, mùvwa mwanèètù wa balùme kampànda wa ba-Baptistes. Úvwa dyàmbedi

mwakwidyanganyi, wa meeji matwè, muntu wa meeji, mumanye mikenji; muntu munène, mumanyi wa dibàla. Dìngà ditukù kuditwayè mu dibala dyà Bible, ne kumònayè ne kùvwa mwà kulwa kampànda wa bàbiikila ne m'Maasiyà. Ne pààkenzàye aci, mòna's, ki yèyè kubanga kuumvwa bàmba bwà Yesù ewu, ki kwambayè ne: "Ngátwishiiibu. Ne ndi njikula patòoke diitabuuja dyànyì ne Yesù ùdi Kilistò, Mwànà wa Nzambi awu." Ùvwa Baptiste wa cyà bushùwà. Ki yèyè ulwàlwa ewu ne: "Ndi njikula patòoke ne Yesù ùdi Kilistò." Kuditwayè mu dicyènza bikolè mu mùshindù wà ne Nzambi wàkamubiikila ku mudimu wà bwambi. Nzambi misangu yònsò neàkulè ànu ne mwoyi ùdi mulelèlà.

¹²⁸ Ne kùvwa kalùmyànà kampànda kenji kàà ntentà kuntwaku dìnà dyàkù Akulà ne Piisikilà, mulùme ne mukàjèndè. Bàvwa benji bàà ntentà. Byenzedi nshapità wa 18, ngudi unwàmbilaci awu. Pòlò, bòbò bàvwa balundà bèndè. Bàkààvwa bapetè Nyumà Mwimpè ku byanza byà Pòlò ne ku dilongesha dyèndè.

Kuumvwabò bàmba ne kùvwa ditàbuluja kampànda kuntwaku, ki kukùyabò. Kùvwa bantu ànu bu dikumi anyì dikumi ne bàbìdi nàнку awu bàvwà bayèmu. Ki yèyè kuyakù bwà kwanji kumòna, ki kutèelejayè muiyishi awu mùvwàye ùyiisha, meeji matòoke à mwoyi wèndè. Kwambayè ne: "Udi mumanye's, ngeela meeji ne yèyè mmufwànyine kutèelejakù Bulelèlà."

Pa nàнку paanyimà pàà disangisha dimanè kujika, kumubiikidilayè kumfundu kwà ntentà aku, kwambayè ne: "Tàngilà, tudi ne mwanèètù wa balùme mukèsè wipacila bule ebu, mwena Yudà mukèsè wa dyùlù dikònyàngàle, nènku, kàdi pààlwayè, yèyè neàkulongèshe Dìyì dyà Nzambi, byà bitòoke tòò." Èè, paanyimà pàà katanci . . .

¹²⁹ Pòlò ùvwa ùsanganyiibwa mu bùlokò musangu wòwò wùm>wè>wùm>wè awu. Mwaba mubi be bwà muiyishi wa cyena-leelù's, kí mmwòmò anyì? Kàdi ùvwa mu bùlokò, ne Mukalenge nguvwa mumwelèmu. Nènku paanyimà pàà dizakala dyà buloba dimanè kwenzeka, dinyùkùshe bùlokò abu ne dibùpùle, yèyè kwangata mulami wa bùlokò awu ne bàà mu nzùbu mwèndè e kubàbàtiizayè bwònsò, mu Dìnà dyà Mukalenge Yesù, ne kwasayè lwendu e kuya, kulwayè kuntwaku.

Ne yèyè ùcivwa ànu ùfùminakù ku diipata dyà démon munda mwà mwànà mukèsè wa bakàjì kuntwaku, wa kale uvwa wenza lubùku. Ne, piine apu, bàvwa bàpetela mfranga bùngi cyanàànà ku mwànà wa bakàjì awu, pa nàнку yèyè kwelayè patòoke cisalu cyàbò aci, ki dībà adi kumwelabò mu bùlokò bwà bwalu abu. Kàdi Mukalenge kunyùkushaYè bùlokò abu ne kubùpula, bwalu Yèyè ùvwamù ne musumbà wa bantu bàvwà ne cyà kutèeleja Bulelèlà. Kwèna mwà kuswikakù Dìyì dyà Nzambi to.

Kùdi . . . Nànsha byà munyi, kwèna mwà kucyènzakù to. Kwèna ànu mwà kucyènza to.

¹³⁰ Ki kulwayè kuntwaku mwaba wùvwà muntu awu ùsanganyibwa. Nènku Akulà ne Piisikilà, bàvwa pàmwàpa ne ndambù wa màmpà mapàya minyìinyi. Ne dyàkàmwè paanyimà pàà bamanè kudyà màmpà mapàya minyìinyi awu, kwambabò ne: “Netùye ku ditàbuluja adi kwàka.”

Pòlò kusòmbelayè lwà paanyimà apu mukwàte ku kaamùzàbì kèndè aku, ùtèèleja mùvwà muyiishi wa ba-Baptistes ewu ùyiisha.

Kwambayè ne: “Mbilenga byà dikèma, byùdi uyiisha abi, kàdi kùdi bikwàbò kàbìdì byà ku Cyòci aci.” Yèyè ne: “Ndi muswè nkwelèku lukonko, Docteur Apòlo. Ukààdikù mupetè Nyumà Mwímpè kacya wítabuuja anyi?”

“Kaa,” mwàkambàye, “katùvwakù bamanyè ne aci cìvwakù to. Wèwè udi uswa kwamba cinyi, bwà ‘Nyumà Mwímpè?’ Twètù’s tudi ba-Baptistes.”

Yèyè ne: “Wàmanyi bìshi mùdì Baptiste?” Nwamònu anyi?

“Èè, twètù’s tudi babàtìijìibwe. Tudi bamanye ànu dibàtìiza dyà Yone.”

Yèyè ne: “Yèyè awu wàkabàtìiza ànu bwà kanyinganyinga cyanààna, wàmba bwà ‘kwitabuuja Ewu uvwa ulwa,’ mbwena kwamba ne mu Yesù Kilistò.”

Nènku pààkuumvwàye aci, bààkabàtìijìibwa cyàkàbìdì, mu Dìna dyà Yesù Kilistò. Ki Pòlò kubàtentekelayè byanza, ne Nyumà Mwímpè kubàpwekela Yè, ne bààkaakula mu myakulu ne bààkamba bipròfetà. Kwambayè ne: “muntu nànsha nganyi.”

¹³¹ Mpindyewu, mpindyewu, twètù tudi tucyènza munyi? Ndi muswè kunwàmbilakù kaacintu kampànda, pashìishe mèmè . . . Netwimanyikè, bwalu, bìdì, mvwa munwàmbile ne nènnùpàtùlè kumpàlà kwà dìbà. Nwàmanyi cìdì Nyumà Mwímpè. Bwa Mufùndù wà ndekeelu dilòòlò edi . . . Ndi ne mushiki mukwàbò kaaba aka, kàdi nebikèngelè bwà twètù kushiya aci ku luseke. Tùbuululàayi mu Kolintò wa Kumpàla 12. Ne pashìishe netùbalè eci, ne pashìishe netù—netùjikijè. Èyo. Kolintò wa Kumpàla, nshapità wa 12.

Mbanganyi bàdì bìtabuuja dilongesha dyà Pòlò Munsantu? Bushùwà’s! Mmwambe, mu Ngalàtìyà 1.8 ne: “Mwanjèlò yèyè mulongèshe nì ncinyi nì ncinyi cyà cishìilàngàne, èdiibwè mulawu,” bwà muyiishi kaayi yèyè katwàmbi to. “Mwanjèlò wa mu Dyulu yèyè mutùùlùke panshì apa ne yèyè mulongèshe nì ncinyi nì ncinyi cyà cishìilàngàne, èdiibwè mulawu.” Nwamònu’s, kùbwelakanyimù to.

¹³² Mpindyewu tàngilàayi eci, Kolintò wa Kumpàla 12. Mbanganyi—mbanganyi bàdì bamanyè ne bìdì bikèngela twikalè mu Kilistò bwà kufika ku dibìkà dyà ku lufù, bwalu Mubidi

Wëndè ngùdì Nzambì mulayè bwà kubiisha ku lufù? Kakwèna mùshindù mukwàbò to. Kakwèna mùshindù mukwàbò to, pawikalà pambèlu pàà Kilistò.

Udi mufwànyine kutàngila paanyimà *apa* ne kuMwitabuuja, kwamba ne: “Bushùwà, mèmè ndi muMwitàbùùje. Yèyè m’Mwànà wa Nzambì.” Bìmpè, mwanèètù, mèmè ndi pabwìpì bwà kukulabula ku cyanza paùdì wamba nànkù. “Ndi muMwitàbùùje. Nènjikulè ne Yèyè ùdì Musùngidi wanyì.” Abi mbìmpè, kàdi kwèna ànu munda Mwèndè to. “Nèndabulè muiyishi ku cyanza. Nèntondè mpèkaatù yànyì.” Aci kacyèna ànu kwikala munda Mwèndè to.

¹³³ Mpindyewu tàngilàayi, mònaayi cìdì Pòlò mwambe, mùdì ubwela munda mwà Kilistò. Nèumanyiiwbè ne udi mutengula munyì? Abraham, bàvwa bàfila cimanyinu. Tèèlejàayaaku eci mpindyewu, Kolintò wa Kumpàla, nshapità wa 12, nènkù túbàngilàayi ku mvensà wa 12.

Bwalu bu mùdìbi ne mubidi wùdi wùmwe, kàdi mwikàle ne bidimba byàbùngì, ne bidimba byònsò. . . byà mubidi wùmwe awu, biikàle byàbùngì, bìdì mubidi wùmwe, kì mùdì kàbìdì Kilistò. (Kàyi mutàpùlùke to. “Umwèpelè!”)

Tèèlejàayi. “Bwalu ku èkèleeziyà umwe” anyì? Mbanganyi bàdì bènda bàndonda mu kubala eku? “Ku dilabulangana òmwè dyà ku cyanza” anyì? “Ku màyi amwe” anyì? To. Nànkù muntu kampànda mmutùpàkàne’s.

“Ku Nyumà umwe!” Ùdì ne dileetà dinène anyì? Aci cìdì, “Nyumà Mwìmpè,” dìbà adi. Nwamònu anyì?

. . .ku Nyumà umwe nkutùdì bònsò babàtùjùbwe mu mubidi wùmwe, nànsha twètù biikàle beena Yudà anyì bàà Bisàmbà byà bendè, nànsha twètù biikàle bapika anyì badìshikàmìne; ne tudi bònsò bafikìshùbwe ku dinwà mu Nyumà umwe.

¹³⁴ Mubidi wà Kilistò wùdi Nyumà umwe, mùdì cidimba cyònsò, kubàngila ku Mpenta too ne dìbà edi, cìnwa Mvinyò mupyamùpyà umwèumwè awu, Nyumà Mwìmpè umwèumwè awu, mwikàle ùfila bipeta bìmwèbìmwè abi. Tudi tucyèna munyì? “Ku Nyumà umwe.”

Nciibi cyunzulula cyà Nzambì, Nyumà Mwìmpè awu. Yèyè ùdì cinyì? Nciibi cyunzulula cyà Nzambì. Ncimanyinu. Ncitampì. M’Musàmbì. M’Mutùlumbulwidi. Nditwìshiiwà. Ndiikisha. Nditalala. Mbwìmpè. Ndyondopiibwa. M’Mwoyi. N—nciibi cyunzulula cyà Nzambì ku bintu byònsò ebi. Nciibi cyunzulula cyà Nzambì ku Kilistò, udi ne . . .

Nzambì wàkajaadika ne Yèyè wàkabiisha Yesù ku bafwè, ne aba bàdì bafwè mu Kilistò Nzambì neálwe naabò pàmwè Nèndè ku dibiiikà dyà ku lufù. “Kanùbungamiji Nyumà Mwìmpè

kunwàkatwibwà cìtampì mu Kilistò too ne ku ditùkù dyà bupikudi bwènù.” Yoyòyò! Mbanganyì bàdì bàciitabuujà?

¹³⁵ Kilistò ùdi cinyì? Nyumà Mwímpè ùdi cinyì? Kí ncintu cìdì bantu bàseka to. Ncintu cìdì bantu bàseka; kàdi kí nnànkù to, bwà mwena kwitabuujà.

Mbwà mwena bupidyà! Mvwa njinga bwà ngikalakù ne mbingu yìbìdì anyì yìsàtù yà mileemìlè’s, Mvwa mwà kuswàku ngàngatè mààlabà dilòòlò bwà mèmè kunwàmbila cìdìYe bwà mwena bupidyà. Lekèlaayi mbìtèèlèku ànu lùkàsàlùkàsà, mu katanci kakesè cyanààna. Ncintu cyà bàseka. Mbutèyi. Ndibwe dyà cilèndwishi. Ndufù. Nditàpuluka dyà Cyendèlèlèlè ne Nzambì. Ncyèna ànu mwà kwela meeji ku byònsò bìdiye bwà mwena bupidyà to!

¹³⁶ Vùlukàayi ne, mvula umwèumwè wákasekabò kùdì mwena bupidyà awu, nyèyè mvula umwèumwè awu wàkasungila Noà ne dikù dyèndè. Nwamònu anyì? Nyumà umwèumwè awu, Nyumà Mwímpè udi bantu bàseka bàmba ne “mmupàle, ne musumbà wà bapàle, ne Ùdi katombòtombò awu”, n’Yèyè udi cintu cìmwècìmwè cyàmbulà Èkèleeziyà mu Dyambwibwa ne kuya Nendè muulu ku matùkù à ndekeelu; cyàtwàlà dilumbulwisha pa mwena bupidyà. Ncyà bushùwà. Kì cìdì Nyumà Mwímpè ncyòcì aci.

¹³⁷ Bàà disànka ng’aba...Swàyi ngàmbèku nùnkù, mu meeji matòòke à mwoyi wànyì. Bàà disànka ng’aba bàdì Nendè ne nzala ne nyòòtà, bwalu bòbò nebùùkucishiibwè.

¹³⁸ Mààlabà dilòòlò netwàkulè pa mùshindù, cìdìYe wènza pàdìYe ùlwa.

¹³⁹ Mpindyewu, mbanganyì mwaba ewu bàdì baswè kupeta Nyumà Mwímpè, ne baswè bwà muntu kampànda kunusambidilayè, bwà nùmonè Bukènkè?

Nwàmanyì “cìdìYe.”

Mpindyewu, mààlabà dilòòlò, netwàngatè, “cìdìYe wènza.”

¹⁴⁰ Ne pashìishe dilòòlò dyàlondà, cìdì, “mùshindù wà kuMupeta.” Pashìishe netùbìikilanganè, kulongesha bantu kaaba aka, ne kubwela buludì mu bibambalu ne kushààlamù, nì bìdì bikèngela cikondo cyònsò too ne ku Noël, bìdì ànu bímpè, ànu too ne pààlwà Nyumà Mwímpè. Netwìkalè mwà kuMulengela pa cishìmikidi cyà ne meeji mu òwò, cyà Bible. NetùMulengè ne kuMupeta ànu mùdì Nzambì muMulayè, ne mwàkapwekàYe ku cibangidilu amu. Kì mùshindù wùdì wùkèngela bwà twètù kucyènza kaaba aka ngwòwò awu. Ndi... Cìdì nì nganyì nì nganyì wàmba kacycèna ne cìdìcì cìshintulula to, twètù tudì... .

Dìyì dyà Nzambì dìdì...ndìdì ne bukòòkeshi munda mwà mwoyi wànyì. Ncyà bushùwà. Ne ndi muswè cìdì Nzambì naaci bwànyì mèmè aci. Kwòkù cikwàbò cintu kàbìdì, unzulùlà Dyulu,

Mukalenge, bwalu mwoyi wànyì—wànyì mmunzulula bwà cyôci aci. Ncyà bushùwà.

¹⁴¹ Mbanganyi bàdi bàMujinga? Mpindyewu ela cyanza muulu, wámbe ne: “Nsambidilèku.” Mpindyewu, panùcidi bashààla ne byanza byela muulu apu.

Taatù wa mu Dyulu, twálongèshi ntàntà mule. Kàdi Nyumà Webè ùdi kaaba aka. Kùdi byanza bìdi byela muulu mpindyewu. Ne bôbò mbamanye cìdiYe, ne mbamanye cìdi Nyumà Mwímpè ùmvwija. Nyèwù ndòmba, Nzambì, bwà kumpàlà kwà masangisha aa kujikawù, bwà cyanza cyònsò cìdi mwaba ewu cyèdiibwè muulu ne bààMupeci. Enzàku nàнку, Mukalenge.

¹⁴² Tudi tubàlòmbela. Tudi tuKulòmba bwà ùbàbènèshèku, ne ùbàpèèshèku dijinga dyà mwoyi wàbò. Tàngilàaku byanza byàbò, Mukalenge. MbaKunangè. Bàdi bàMukèba. Mbamanye ne kabèena mwà kuya...Màalabà dilòòlò, bu Wèwè mwà kungambulwishakù, Mukalenge, tudi mwà kucijaadikila mu Mifundu bwà ne kabàakuyakù mu Dyambwibwa bôbò kabàyi Nendè to. Pa nàнку nyèwù ndòmba, Taatù, bwà Wèwè kubàpèèshakù nzala ne nyòòtà, bwà bààmòna mwà kukucishiibwa. Nyèwù mbàleeja Kùdi mpindyewu, Taatù. Nèнку, filakù mabènesha aa, patùdi tulòmba nùнку mu Dìna dyà Yesù apa. Amen.

Ndi muMunange, ndi muMunange
Bwalu Yèyè wàkannanga kumpàla
Ne wàkampetela lupàndu
Pa mucì wà Kàlvariyò.

¹⁴³ Ndi muswè kwamba nùнку kumpàlà kwà twètù kwimba cyàkàbìdi. Ndi muswè ntwilanganèku ne musumbà wà bambi mu cibambalu emu, Mu diitànù dilòòlò, kumpàlà kwà disangisha kubangadi, nwamònu's, mu diitànù dilòòlò. Ndi... .

Nudi numòna cìndi nteeta kwenza aci anyi? Kuleeja cìdiYe, mùshindù wà kuseemenaKù ne cìdi cikèngelà kuneemeka; dìbà adi kwèna ulwa mwenzè bu mpofo to, wenda ubaabata. Ki bwà cinyi ncyèna mucilòmbekù dilòòlò edi to. Ndi muswè bwà nùmanyè cìdiYe. Mmulayi. Ncitampì. M'Musàmbi awu. Mbikwàbò byònsò.

Pashishe, màalabà dilòòlò ne dilòòlò dyàlondà, dìbà adi netùbangè dìbà adi mene, kubangila ànu apu, too ne pààlwàYe. Kùcyùku bwà ntàntà wàngatabi to; netùshaalè too ne. Sukùlà mwoyi wèbè. Yèyè kàakuMupòngololakù mu mwoyi mukoooyike nànsha. Dikùmbàje, dilongòlòle, ne Yèyè neàmufilè.

Ndi muMunange, ndi muMunange
Twèlàayi byanza muulu mpindyewu.
Bwalu Yèyè wàkannanga kumpàla
Ne wàkampetela lupàndu

Pa mucì wa Kàlvaryò.

Mpaasàtà wáfumu ku dyamba, ne twétù tudi twitaba ne, mààlabà dilòòlò netùbangè pa díbà mwandamutekète pamutù pàà díbà mwandamutekète ne tusunsa makumi àsàtù. Ne aci necìmpetèshèku mwà kunùpàtula pa díbà mwandamukùlù ne tusunsa makumi àsàtù pamutù pàà díbà citèèmà ne tusunsa makumi àsàtù. Pa díbà mwandamutekète ne tusunsa makumi àsàtù-...Pa díbà mwandamutekète jaajaaja, mààlabà dilòòlò, dilombola dyà misambu nedìbangè. Mémè nêmbwelè mu Diiyiisha dyànyì pa díbà mwandamutekète ne tusunsa makumi àsàtù.

Ndi muMunange,

Tùpatulàayi mìshwàlà yètù ne tùyìkùpaayi kùdiYe.


Ndi muMunange

Tùpupulàayi mmwènenenu wetù wa bintu byà kwìsùkwìsù awu mpindyewu!

Bwalu Yèyè wàkannanga kumpàla

Ne wàkampetela lupàndu

Pa mucì wa Kàlvaryò.

Èyo, mpaasàtà wenù mpindyewu, Mwanèètù Neville. 

59-1216 Nyumà Mwîmpè Ncinyi?
Branham Tabernacle
Jeffersonville, Indiana États-Unis

CILUBA

©2021 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilamininyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org